

四庫全書

史部

欽定四庫全書

山西通志卷一百五

人物五

太原府

五代

張源德晉人從李罕之入梁自金吾衛將軍為蔡州刺史
史梁貞明三年分魏相等六州為兩鎮遣劉鄩將兵
萬人屯於衛以虞變魏軍迫節度使賀德倫以魏博

降晉時源德為鄴守貝州晉王入衛先襲破德州乃以兵五千攻貝源德堅守不下晉軍塹而圍之已而劉鄩大敗於故元城南走黎陽晉軍攻破洺州而衛邢磁相滄或降或棄城走當此時晉已先下全燕而鎮定皆附於晉自河以北山以東四面千里六鎮數十州之地皆歸晉獨貝一州圍之踰年不可下源德守既堅而貝人聞晉已盡有河北城中食且盡乃勸源德出降源德不從遂見殺

張丕陽曲人尚氣節後唐武皇鎮太原用度多選富家
子主帑庫或調度不給即坐誅沒入貲產丕為之滿
歲府財有餘宗人政當補其任率族屬泣拜請丕濟
其急丕又為代掌一年鄉里服其義孫潁晉安州防
禦使

李嗣昭本姓韓氏汾州大谷縣民家子太祖出獵至其
家見林中鬱鬱有氣召其父問焉父言家適生兒太
祖因遺以金帛而命弟克柔養為子初名進通後更

名嗣昭嗣昭短小而膽勇過人初嗜酒太祖嘗微戒之遂終身不飲太祖愛其謹厚常從用兵為內衙指揮使王珙與兄珂爭立遣嗣昭助珂敗珙於猗氏獲其將三人梁軍救珙又敗之於胡壁堡執其將一人光化元年梁遣丁會應李罕之嗣昭與戰舍山執其將一人斬首三千級遂取澤州二年晉遣李君慶攻梁潞州君慶敗嗣昭攻克之三年取梁洺州天復元年梁圍太原嗣昭日以精騎出擊梁兵會大雨梁軍

解去復取汾州斬叛將李瑋遂出陰地取慈州降其
刺史唐禮又取隰州降其刺史張瓌是歲梁軍圍鳳
翔嗣昭乘間攻梁晉絳戰平陽執梁將一人進攻蒲
縣梁朱友寧氏叔琮以兵十萬迎擊之嗣昭走梁軍
圍太原太祖謀走雲州李存信等勸奔契丹嗣昭力
爭以為不可乃止嗣昭晝夜出奇兵擊梁軍梁軍解
去嗣昭復取汾慈隰是時鎮定皆絕晉而附梁晉外
失大國之援內亡諸州浹歲間孤城被圍者再於此

時嗣昭力戰之功為多天祐三年與周德威攻梁潞州降丁會為昭義軍節度使梁遣李思安將兵十萬攻潞築夾城以圍之梁太祖嘗遣人招降嗣昭斬其使者閉城拒守踰年莊宗始攻破夾城嗣昭完輯兵民撫養甚有恩意梁晉戰胡柳周德威戰死莊宗欲還臨濮嗣昭曰梁軍已勝旦暮思歸吾若收軍使彼休息整而復出何以當之宜以精騎撓之因其勞乏可以勝也莊宗然之是時梁軍已登無石山嗣昭轉

擊山北而莊宗以銀槍軍趨而呼曰今日之戰得山者勝晉軍爭登山梁軍遽下陣於山西晉軍從上急擊大敗之權知幽州居數月代去幽州人皆號哭閉關遮留之夜遁乃得去十九年從莊宗擊契丹於望都契丹圍數十重嗣昭以三百騎決圍取莊宗以出是時閻寶敗於鎮人代為招討鎮兵出掠九門以奇兵擊之鎮軍且盡餘三人匿破垣中嗣昭馳馬射之反為賊射中腦顧箴中矢盡拔矢於腦射殺一人還

營而卒嗣昭諸子繼傳長而懦弟繼韜自立為昭義
軍留後遣其弟繼遠入梁梁拜繼韜同中書門下平
章事居數月梁滅會赦至因隨其母楊氏朝於京師
以賂獲釋後令繼遠起變於軍中事泄斬竝斬繼遠
以繼傳知潞州事其弟繼達殺繼傳節度副使李繼
珂募市人千餘攻繼達繼達走城外自剄死嗣昭七
子繼能繼襲皆見殺惟一子繼忠僅免晉高祖立以
為忻隸單三州刺史開運中卒先是楊氏積貲贏百

萬嗣昭父子三人賴之

王權字秀山太原人唐左僕射起之曾孫父堯官至右
司郎中權舉進士為右補闕唐亡事梁為職方員外
郎知制誥翰林學士累遷御史中丞唐莊宗滅梁貶
隨州司馬起為右庶子累遷戶部尚書晉高祖時為
兵部尚書當奉使於遼辭不行坐是停任踰年以太
子少傅致仕卒年七十八贈左僕射

張憲字允中晉陽人沉靜寡慾少好學能鼓琴飲酒莊

宗素知其文辭以為天雄軍節度使掌書記及即位拜工部侍郎租庸使遷刑部侍郎判吏部銓東都副留守憲精於吏事甚有能政莊宗幸東都命治即位壇為鞠場憲言即位壇王者所以興也漢鄠南魏繁陽壇至今皆在不可毀莊宗卒毀之又問憲庫錢幾何憲上庫簿有錢三萬緡莊宗謂以故紙給我益怒之郭崇韜伐蜀薦憲可任為相而宦官伶人不欲憲在朝廷樞密承旨段徊曰憲材誠可用不如任以一

方乃以為太原尹北京留守趙在禮作亂憲家在魏
州在禮善待其家遣人以書招憲憲斬使不發書而
上之明宗入京師永王存霸奔太原左右請拘之憲
曰吾本書生無尺寸之功而人主遇我甚厚豈宜懷
二心以幸變第可與之俱死爾從事張昭遠教憲奉
表勸進憲涕泣拒之已而北京巡檢符彥超麾下兵
大譟殺存霸憲出奔忻州亦見殺

五代史傳論予於舊史考憲事實而永王存霸符

彥超與憲傳所書始末皆不同要其大節亦可以見也憲之志誠可謂忠矣當其不顧其家絕在禮而斬其使涕泣以拒昭遠之說其志甚明至其欲與存霸俱死及存霸被殺反棄太原而出奔然猶不知其心果欲何為也而舊史書憲坐棄城而賜死予以為不然予之於憲固欲成其美志而要以憲失其官守而其死不明故不得列於死節也

安永信交城人知勇過衆文武兼資為唐節度使謚忠

簡贈太師

相里金字奉金并州人也勇悍而折節下士為五院軍
隊長戰栢鄉胡柳皆有功遷黃甲指揮使同光中拜
忻州刺史時諸州皆以部曲主場務漁蠹公私金獨
禁部曲不與事遷隴州防禦使廢帝起兵鳳翔首遣
判官薛文遇往來計事廢帝初拜保義軍節度使晉
高祖起兵為太原四面步軍指揮使晉初徙鎮建雄
罷為上將軍天福五年卒贈太師

李筠太原人善騎射初隸後唐秦王從榮麾下從從榮
至天津橋射殺十數人已而遁去清泰初應募為內
殿直遷控鶴指揮使晉開運末趙延壽召寘帳下及
延壽被執遼將耶律解里統二千騎留鎮州筠與諸
將謀伺間擊之控鶴左廂都校白再榮持兩端匿室
中筠拔佩刀破幕引臂逼再榮行殺傷相當解里棄
城去漢高祖立授博州刺史周太祖鎮大名表為先
鋒指揮使又為北面緣邊巡檢洎起兵入汴從敗幕

容彥超於留子陂有功周太祖立遷昭義軍節度使
檢校太傅同平章事累以奇兵擊敗遼援北漢兵加
兼侍中周恭帝立進太尉宋太祖立遣使加兼中書
令諭以入朝筠即欲拒命不得已下拜及延使者升
階置酒張樂遽索周太祖畫像懸壁涕泣迸諸賓佐
告宋使曰令公被酒失其常性幸勿為訝未幾遣牙
將劉繼冲等稱臣於北漢主劉承鈞宋太祖遣其子
皇城使守節諭旨筠謀益急遂起兵從事間邱仲卿

曰大梁兵甲精銳難與爭鋒我孤軍舉事其勢甚危
倚援河東終未得力不如西下太行直抵懷孟塞虎
牢據洛邑東向爭天下計之上也筠曰吾周朝宿將
禁衛皆舊人必倒戈歸我況有儋珪槍撥汗馬何憂
天下哉儋珪筠愛將有勇力善用槍撥汗筠駿馬日
馳七百里故筠誇焉頃之使人殺澤州刺史張福據
其城承鈞率兵來援筠上謁於太平驛見兵衛寡弱
內甚悔承鈞封筠西平王筠自陳受郭氏大恩不敢

愛死而周與漢為世讐承鈞心疑之命宣徽使盧贊
監其軍筠益怏怏留子守節守上黨自引衆南向宋
遣石守信等討之敕曰勿縱筠下太行急進師扼其
隘破之必矣太祖遂親征與守信會破筠衆於澤州
南殺盧贊筠走還保澤州太祖親督戰拔其城筠赴
火死隨進兵潞州守節降除單州團練使筠事母孝
每怒將殺人母屏風後呼曰可為吾曹增福遽舍之
筠有愛妾劉氏欲俱死筠以其有娠麾令去

聶文進并州人善書美給事漢高祖帳中高祖鎮太原
以為押司官高祖即位歷拜領軍屯衛將軍樞密院
承旨遷右領軍大將軍及謀殺楊邠等文進夜作詔
書制置中外邠等已死文進點閱兵籍指揮殺戮以
為已任周兵至京師太后使謂文進善衛帝對曰臣
在此百郭威何害旋見殺

鄭仁誨字日新太原晉陽人初事唐將陳紹光紹光嘗
因醉怒仁誨拔劍欲殺之左右皆奔走仁誨植立不

動無懼色紹光擲劍於地曰汝有器量必富貴非吾所及也仁誨後還鄉里事母以孝聞周太祖居河東帳下時時往過仁誨與語甚懽每事有疑即從質問仁誨所對不阿周太祖益竒之漢興薦為內客省使攻李守貞於河中軍中機畫多所參決太祖入立為大內都點檢恩州團練使樞密副使累遷宣徽北院使出為鎮寧軍節度使顯德元年拜樞密使世宗攻河東仁誨留守東都明年冬疾卒仁誨自其微時常

金史卷一百五
卷一百五
為太祖謀畫及居大位太祖世宗皆親重之性謙謹
好禮不自矜伐為士大夫所稱贈中書令追封韓國
公謚忠正

李重進太原人周太祖甥生於太原累官歸德軍節度
使宋太祖受禪加重進中書令治城繕兵以拒城陷
舉族自焚死

韓通并州太原人以勇力聞補騎軍隊長漢祖寘帳下
累遷軍校轉衙隊副指揮使從討杜重威得銀青階

檢校國子祭酒漢初加檢校左僕射隱帝遷奉國指
揮使乾佑初周祖伐河中知通謹厚命自隨先登身
被六創遷都虞候為天雄軍馬步軍都校周祖委以
心腹及入汴甚有力焉授奉國左第六軍都校領雷
州刺史廣順初轉虎捷右廂遷左廂克孟州巡檢繼
領永睦二州防禦使親征兗州為在京右廂都巡檢
時河溢灌河陰城命率廣銳卒千二百浚汴口又部
築河陰城初營壁尋拜保義軍節度觀察留後正授

節度命副河中王彥超出晉州道擊劉崇為太原北
面行營部署穴地道攻其城俄班師移鎮曹州檢校
太保世宗以深冀間有胡蘆河東西橫亘數百里堤
場非峻不能扼遼師奔突顯德二年命浚治之功未
就遼師至通迎擊退之遂城李晏口為靜安軍四旬
而訖又城東鹿鼓城葺祁州收瘞遺骸為萬人冢又
城博野安平領百餘騎督役會遼騎數百奄至通率
麾下與戰日暮大風雨遼人解去又城百八橋鎮武

強縣胥旬日訖攻秦鳳為西面行營馬步軍都虞候
入大散關圍鳳州分兵城固鎮以斷蜀餉道遂拔鳳
州授侍衛馬步軍都虞候征淮南命為京城都巡檢
時築新城又廣舊城街道通領其役會幸淮上留為
在京內外都巡檢權點檢侍衛司才半歲而城工訖
三年改節忠武檢校太傅又改侍衛馬步軍都虞候
辛壽春復為京城內外都巡檢改節歸德六年春詔
按行河堤因發徐宿宋單等州民浚汴渠數百里北

征命先赴滄州賜襲衣金帶鞍馬器帛即領兵入遼
乾寧軍南俄為陸路都部署又命巡北邊自浮陽至
淤口浦壞坊三十六遂通瀛莫初克益津闕以為霸
州後濱棣民數千城之命董其役師還以檢校太尉
同平章事充侍衛親軍馬步軍副都指揮使恭帝移
領鄆州陳橋之役通在殿閣聞有變惶遽而歸軍校
王彥昇遇於路策馬逐之通馳入其第未及闔門為
彥昇所害妻子皆死太祖詔贈中書令以禮收葬遣

高品梁令珍護喪事通性剛而寡謀號韓瞠眼其子
有智畧號橐駝兒常勸通早為之所通不聽後太祖
見通及其子畫像於開寶寺壁遽命去之

趙廷隱并州太原人隨孟知祥入蜀拳勇有智畧知祥
麾下無及者東川董璋襲成都廷隱大破之璋奔歸
為部下所殺知祥遂有其地及僭號令總親軍為衛
聖諸軍馬步軍指揮使累遷至太師中書令宋王卒

謚忠武

趙崇韜廷隱子驍果有父風為都知領殿直四番後累遷至客省使周世宗克秦鳳將入蜀境為崇韜拒退歷左右衛聖步軍都指揮使選其子文亮尚主加領洋州武定軍節度山南武定緣邊諸砦都指揮副使漢源之戰獨策馬先登及軍敗猶手擊殺十數人為

宋師所擒

高彥儔并州太原人父暉宣威軍使彥儔從知祥入蜀累歷軍校為昭武軍監押景嗣位遷邛州刺史改馬

步軍使漢兵入大散關克安都砦彥儔以所部先進
漢人燒砦毀閣道盡銳追之復其砦而還尋領趙州
刺史為奉鑾肅衛都指揮副使改右驍銳馬軍都指
揮使加光聖馬軍都指揮使真拜源州武定軍節度
周顯德初向訓攻鳳州彥儔出兵未至聞唐倉敗潰
歸判官趙玘以城歸周彥儔遁歸成都景不之罪為
右奉鑾肅衛都指揮使改功德使廣政二十二年授
夔州寧江軍都巡檢制置招討使加宣徽北院事利

州昭武軍節度宋師至謂副使趙崇濟監軍武守謙
曰北軍涉遠而來利在速戰不如堅壁以待之守謙
不從獨領麾下出戰猪頭舖敗走彥儔以所部將出
拒戰宋師已乘城而入判官羅濟勸單騎歸成都彥
儔曰我昔已失天水今復不能守夔州縱不忍殺我
亦何面目見蜀人哉濟又勸降彥儔曰老幼百口在
成都若一身偷生舉族何負吾今日止有死耳即解
符印授濟具衣冠望西北再拜登樓縱火自焚後數

日劉廷讓得其骨煨燼中以禮收葬初景母語景惟
彥儔可任及是果能死難

王淡唐相溥之子入閩依王審知仕宦

宋

藥元福并州晉陽人幼有膽氣善騎射初事邢帥王檀
為廳頭軍使事後唐為拱衛威和親從馬鬪軍都校
天平軍內外馬軍都指揮使晉天福中為深州刺史
開運初駕駐澶淵契丹陣城北元福以左千牛衛將

軍領兵居陣東偏澶民馬破龍告契丹曰先攻其東
即浮梁可奪契丹盡銳來戰元福領二百騎躍出而
鬪奮鐵撾擊契丹斃者數人左右馳突無不披靡契
丹兵潰上登城望見召撫之曰汝奮不顧命雖古忠
烈無以過擇名馬賜之明日將戰面授鄭州刺史為
權臣所沮止刺原州俄改秦州明年與李守貞符彥
卿皇甫遇張彥澤等禦契丹於陽城為右廂副排陣
使士馬饑渴契丹順風揚塵諸將欲俟風反戰元福

曰軍中饑渴已甚若俟風反出戰吾屬為虜矣彼謂我不能逆風以戰宜出其不意以擊之此兵家之竒也乃率麾下騎開拒馬出戰諸將繼至契丹大敗追北二十餘里殺獲甚衆擢為威州刺史會靈武三族酋長拓跋彥超石存也廝褒攻靈州節度王令溫詔馮暉鎮朔方率關右兵進討以元福將行營騎兵元福與暉出威州土橋西遇彥超兵七千餘邀暉行李元福轉戰五十里殺千級擒三千餘人又遣部校援

出令溫朔方距威州七百里無水草號旱海師須齋糧以行至耀德食盡比明行四十里彥超等衆數萬布為三陣扼要路據水泉以待暉遣人賂之求和解往復數日至日中列陣如故元福曰彼知我軍饑渴邀我於險既許和解而日中未決此豈可信哉欲困我耳遷延至暮則吾黨成擒矣暉驚曰柰何元福曰彼雖衆而精兵絕少依西山為陣者是也餘不足患元福請以麾下騎先擊西山兵公但嚴陣不動俟敵

少却當舉黃旗為號旗舉則合勢進擊敗之必矣暉
然其策遂率衆進擊敵衆果潰元福即舉黃旗以招
暉暉軍繼進彥超大敗橫尸蔽野是夕入清邊軍明
日至靈州元福還郡詔賜衣帶繒帛銀器漢乾祐中
從趙暉討王景崇於鳳翔蜀兵數萬來援都監李彥
從軍却元福領數百騎自後驅之下令還顧者斬衆
皆殊死戰大敗蜀兵追至大散關殺二千餘人餘皆
棄甲遁去鳳翔平以功遷淄州刺史周廣順初為徐

州行營兵馬都監平楊溫改陳州防禦使未幾王峻
拒劉崇於晉州以元福為西北面都排陣使軍過蒙
坑與仇超陳思讓追至霍邑峻止之元福曰宜追奔
深入以挫其勢諸將畏懦遂止周祖後調兵戍晉州
曰去年若從藥元福言則無邊患矣俄為兗州行營
馬步軍都虞候討慕容彥超詔自晉州率所部入朝
即遣東行賜六銖袍帶鞍馬器仗曰比用曹州防禦
使鄭璋我度彥超凶狡多計謀恐璋不能集事選爾

代之已敕曹英向訓不令以軍禮見汝及至軍中英
訓皆尊禮之推為宿將遂築連城圍充彥超晝夜出
兵屢擊敗之閉壁不敢出十餘日元福營柵皆就又
穴地及築土山百道攻其城會周祖親征元福以所
部先入羊馬城諸軍鼓譟角進拔之以功授建雄軍
節度世宗圍太原城以元福為同州節度充太原四
面濠砦都部署時攻具悉備城中危急以糧運不繼
班師元福上言曰進軍甚易退軍甚難世宗曰一以

委卿遂部分卒伍為方陣而南元福以麾下為後殿
崇果出兵來追擊走之師還加檢校太尉移鎮陝州
又歷定盧曹三鎮宋初加檢校太師九月卒年七十
七贈侍中元福雖老筋骨不衰人或言其氣貌益壯
當復領兵必大喜時稱驍將

薛懷讓其先戎人徙居太原少勇敢隸晉王帳下累歷
軍職明宗時改神武右廂都校領獎州刺史東川董
璋遣率軍從晉祖討賊賊平遷絳州刺史清泰初移

申州晉天福中為鄴都招收使及戰中流矢詔賜湯藥存問又歷沂遼密懷四州詔至闕賜襲衣玉帶為青州行營先鋒都指揮使以功改宿州團練使幸澶州遣與李守貞皇甫遇梁漢璋率兵萬人緣河而下以守汶陽又命為洺州團練使會符彥卿北征為馬軍左廂排陣使又從北面都招討杜重威為先鋒都指揮使及中渡橋降非其志也麻答守鎮州遣步健督洺州供運懷讓聞漢祖舉義即殺步健奉表歸漢

漢祖遣郭從義分兵萬餘與懷讓取邢州契丹帥劉鐸堅壁拒不克而還麻答遣副將楊安以八百騎攻懷讓又命剛鐵將三百騎繼之懷讓戰不勝退保州契丹大掠及鎮軍逐麻答楊安遁鐸又納款懷讓乘其不虞遣人給鐸請置頓鐸開門迎之懷讓殺鐸奪其城即授安國軍節度乾祐初移鎮同州及殺楊邠等急召至闕遂降周祖周初賜襲衣金帶鞍勒馬遣還任加同平章事劉崇入表求西征詔褒之受夏陽

富人張廷徽賂寃趙隱等五人為盜殺之俄獲賊有
司請逮懷讓以宿將釋不問俄為左屯衛上將軍世
宗加左武衛顯德五年拜太子太師致仕恭帝封杞
國公宋建隆元年卒年六十九贈侍中懷讓好畜馳
馬有大烏小烏尤奇駿漢隱帝使求之不獻及罷節
鎮猶有馬百匹索馳三十頭朝夕閱視為娛云

侯章并州榆次人事後唐莊宗為隊長明宗朝遷小校
晉開運末為忠衛指揮使屯陝州為內外馬步軍都

指揮使兼三城巡檢使與趙暉王晏謀斬遼將劉愿
送款於漢祖擢鎮國軍節度乾祐初加同平章事尋
移鎮邠州因見戶為逃擅其租賦乃矯奏貧民數千
戶負稅租願以已俸代詔褒之求副使趙彥鐸良馬
不得誣殺之俄加檢校太師周初加兼侍中廣順二
年入朝請開宴周祖謂左右曰諸侯來朝自當錫宴
以申愷樂豈俟其貢奉為之耶命復賜之仍令有司
自今藩鎮有進奉者勿受俄賜宴廣政殿上壽復不

納三年授鄧州節度封申國公世宗初加無中書令
征壽陽命為攻城水砦都部署俄徙西北水砦再為
武勝軍節度宋建隆元年八月授太子太師封楚國
公既罷節鎮時有輕章者章厲聲曰當遼主謀歸有
上書請避嵩山者我麤人以戰鬥取富貴若此諛佞
未嘗為之坐中有慚者乾德五年卒

邊光範字子儀并州陽曲人性謙退和雅有吏才父仁
嗣忠武軍節度副使光範後唐天成二年起家榆次

令召為殿中丞賜緋長興四年改太常丞晉天福初服闋授校檢戶部員外郎北京留守判官兼侍御史二年拜太府少卿上書曰臣聞唐太宗有言朕居深宮之中視聽不能及遠所委者都督刺史則知此官實繫治亂必須得人今則刺史或因緣世祿或貢奉家財或微立軍功或但循官序實恐撫民無術御史無方以此牧民而民受其賜鮮矣望選能吏以蘇民瘼用致升平奏留中俄為冊秦王李從曠副使張從

恩奏授河南判官遷秘書監兼御史中丞入拜大理
少卿改衛尉充開封府判官又改光祿廣晉府判官
賜金紫出帝初拜右諫議大夫權知開封府事遷給
事中使亳州括借軍糧稱平允出使遼修好至趙州
召還開運元年權知鄭州拜左散騎常侍二年入為
樞密直學士上以藩邸舊僚待遇尤厚因遊宴見位
翰林學士下即日拜尚書禮部侍郎知制誥充翰林
學士仍直樞密院漢初改檢校刑部尚書衛尉卿上

言伏見朝廷除刺史不限年月或未及期年又聞除
代往來跋涉豈暇撫懷望慎選良牧立定年限以責
輯綏之効不報乾祐二年使虞城襄城按民田為吳
越加恩使廣順初出知陳州遷秘書監俄召拜御史
中丞賜襲衣銀器縵綵鞍勒馬復為禮部侍郎將及
秋試言於執政曰他曹公事光範不敢辭若處文衡
校閱名賢品藻優劣非下走所能及期辭疾不出時
論多其自知世宗初改刑部侍郎權知開封府俄遷

戶部顯德三年檢大名民田五年普均租稅光範詣
宋州韓通言其均平世宗嘉之宋初征澤潞命為前
轉運計度鄭洛汝孟懷芻糧拜太常卿以吏部尚書
張昭耆老令簽判選事建隆四年權知襄州路當衝
會餉饋無闕名還復知襄州供億討蜀軍人不知勞
坐舉李檝左遷太子賓客仍知襄州五年兼橋道使
計工以州卒代民官給器用役不淹久人以無擾詔
褒美開寶四年復判吏部銓曹尋判御史臺事數月

真拜中丞六年以疾解銓任卒年七十三光範性孝嘗吮母疽景德中錄孫易從同學究出身

郭從義其先沙陀人父紹古事後唐武皇忠謹特見信任賜姓李氏紹古卒從義纔卅角莊宗畜於宮中明宗與紹古款狎即位以從義補內職累遷內園使晉天福初復姓郭氏坐事出為宿州團練副使內艱歸遂家太原漢祖表為馬步軍都虞候累破契丹於代北及建大號從義首贊其謀擢鄭州防禦使充東南

道行營都虞候領首軍自太行路渡河為河北都巡
檢使討杜重威為行營軍都虞候重威降為鎮寧軍
節度討趙思綰為行營都部署賜戎裝器仗金帶師
至永興圍其城即以為永興軍節度思綰糧盡繫書
矢上射城中說令降仍表於朝許以華州節制思綰
開門納款翌日從義具軍容入城憇侯館中思綰入
謁即令武士執之并其黨三百餘人悉斬於市以功
加同平章事周廣順初加兼侍中移鎮許州顯德初

加檢校太師征劉崇請扈從世宗甚悅改天平軍節度即令從符彥卿破遼師於忻口以功加兼中書令四年移鎮徐州恭帝加開府階宋初加守中書令征揚州願扈從不允乾德二年為河中尹護國軍節度六年疾歸開寶二年改左金吾衛上將軍逾年拜太子太師致仕四年卒年六十三贈中書令從義性重厚有謀畧多技藝尤善飛白書子守忠開廐副使守信字寶臣知書與士大夫游至東上閣門使知邢州

卒子世隆比部員外郎世隆子昭祐承祐昭祐閣門
祗候

武行德榆次人身長九尺材貌竒偉家貧負薪遇晉祖
獵郊外見其所負倍常令力士更負皆不能舉高祖
竒之因留帳下天福初授奉國都校改控鶴指揮使
寧國軍都虞候契丹擾汴被獲行德偽請自效契丹
信之令率軍校載什物鎧甲送歸其國孥舟數十泝
汴至河陰相與潛謀曰我輩皆受國厚恩與其離鄉

并投邊塞曷若共守河陽俟敵兵退以圖富貴皆應
曰諾即共殺契丹監使分授器甲由汜水倍道抵河
陽契丹節度崔廷勳出兵來拒行德麾衆逆擊自旦
及午殊死戰廷勳大敗棄城走遂據河陽盡以府庫
分給將士因推行德知州事厲士卒繕甲兵據上游
士氣益奮人望歸之聞漢祖起自稱河陽都部署遣
弟行友由間道奉表勸進授河陽三城節度使乾祐
中加同平章事移成德軍廣順初加兼侍中改忠武

軍遷河南尹西京留守時鹽禁甚嚴有闕吏與僧希
賞令僧從民媼鬻蔬密寘鹽筥中媼持入城吏擒以
送府行德覺其誣釋媼斬僧及闕吏部下凜然顯德
初封譙國公世宗加兼中書令今完洛陽城改封邢
國節度武寧疏導甬橋東南汙洋達於泗上尋為濠
州行營都部署破淮軍二千俄屯定遠為吳所敗方
降五年復節度保大宋初加中書令封韓國改節忠
武軍進魏國移鎮安州加開府儀同三司入為太子

太傅太平興國三年致仕卒年七十二贈太師

李萬超并州太原人幼孤貧負販以養母隸晉祖軍籍
戰累捷稍遷校從討楊光遠奮勇先登飛石中其腦
氣不屬者久之開運中從拒遼師於陽城流矢貫手
拔矢復戰神色自若以功遷肅銳指揮使開運末以
本部屯潞州主帥張從恩將棄城歸遼太宗會前驍
衛將軍王守恩服喪私第從恩委以後事及遼使至
專領郡務守恩遂無所預萬超奮曰我輩垂餌虎口

苟延旦夕之命今欲殺使保其城非止逃生亦足建
勲業汝曹能乎衆皆喜曰敢不唯命遂率所部大譟
入府署殺其使推守恩為帥列狀以聞漢祖從其請
仍命史宏肇統兵先渡河至潞見萬超曰得復此州
公之力也吾欲殺守恩以公為帥可乎萬超對曰若
賊害於人自取其利非宿心也宏肇大奇之表為先
鋒馬步軍都指揮使路經澤州刺史翟奇堅壁拒命
萬超馳至城下曰并州劉公仗大義定中土所向風

靡後服者族盍早圖之竒乃開門迎納宏肇即留萬
超權州事遂為刺史及征李守貞為行營壕砦使河
中平拜懷州刺史周初從征慕容彥超又為都壕砦
使以功授洺州團練使預收秦鳳改萊州從平淮南
連移蘄登二州所至有善政屬有詔重均田租前年
平令馬陶隱苗不通命繫之將斬而後聞陶懼遁由
是境內肅然宋初入為右武衛大將軍遷左驍衛開
寶八年卒年七十二

張從恩并州太原人父存信振武軍節度後唐明宗嘗
隸存信麾下及即位止授散秩從恩不得志乃退歸
太原晉祖鎮河東為少帝娶從恩女晉初以外戚擢
右金吾衛將軍尋刺貝州遷北京副留守移澶州防
禦使歷樞密副使宣徽南院使權西京留守俄判三
司為襄陽行營兵馬都監少帝初襄陽平遷檢校太
尉開封尹充東京留守改鄴都留守錫賚加等仍賜
銀裝肩輿二俾迎其家明年加同中書門下平章事

命為貝州行營都部署從恩至契丹將趙延昭遁去
詔與杜重威合兵三萬北伐開運初改天平軍節度
時十五將北征以從恩充北面行營都監二年移鎮
晉州又改潞州及契丹入汴從事高防曰公晉室之
親宜盡臣節從恩不聽棄城去巡檢使王守恩悉取
其家財以城歸漢漢祖至汴賜襲衣金帶鞍勒馬器
幣以安慰之尋拜右衛上將軍奉朝請周初遷左金
吾衛征兗州從行世宗加檢校太師封褒國公宋初

改許國公以病免乾德四年卒年六十九

王祚并州祁人初為小吏有心計晉時掌鹽鐵案漢祖鎮并州委經度芻粟即位擢三司副使周為隨商穎三州刺史以俸錢募人開大秦山砦梯路行旅頌德遷鄭州團練使宋初領宿州防禦使子溥執政始諷罷之

石曦并州太原人晉兄弟韓玉暉之子天福中為右神武將軍歷漢至周為右武衛左神武二將軍恭帝初

為左衛將軍會高麗王昭加恩命副戴交充使宋建
隆三年再使高麗遷左驍衛大將軍護秦州屯兵西
人犯邊擊破之斬渠帥十三人太祖征晉領兵二千
人自澤路除道至太原壅汾水灌其城又益兵千人
部攻遼州俄知雄州又為潭州鈐轄開寶八年敗南
唐軍二千餘於袁州平梅山板倉渚洞蠻寇俘馘數
千人太平興國中歷右神武右羽林大將軍連知孟
襄二州遷領誠州刺史雍熙四年改知霸州兼部署

陳廷山謀以平戍軍入北邊曦察知定計擒之以功
加領本州團練使同知鎮州淳化二年移原州遷右
龍武軍大將軍請告詔特給全俸四年卒年七十四
贈賻加等

田景咸王暉皆太原人景咸仕漢奉國右廂都校從周
祖入汴為龍捷左廂都校改安國軍留後俄真拜節
度世宗時改節武勝宋初為左驍衛上將軍開寶三
年卒景咸罷鎮常忽忽不樂妻識其意引徧閱囊儲

景咸方自釋暉多誅求世宗以先朝功臣知而弗問
至右神武統軍建隆四年終右領軍衛上將軍

李洪信并州晉陽人漢昭聖太后第六人洪信居長少
善騎射後唐明宗在藩時隸帳下及即位朱宏實總
領捧聖軍擢為瓜牙漸遷小校廣順中少帝殺宏實
而東捧聖軍數百騎從行洪信預焉及次衛州與晉
高祖遇謀害之時漢祖方護晉祖洪信以兵應之獲
免清泰中又為邕王重美牙校晉初為興順左廂都

指揮使漢祖鎮太原奏隸麾下漢初領陳州刺史左
護聖左廂都指揮使俄加岳州防禦使從降鄴以警
扈勞授侍衛馬軍都指揮使領武信軍節度乾祐中
求解軍職出為鎮寧軍節度歲餘遷保義軍節度初
楊邠令三司擇軍將分補諸鎮都押牙孔目官洪信
聞內難即召悉殺之周廣順初加同平章事洪信常
以妄殺自歎周祖猶因漢太后移鎮京兆兵不滿千
王峻西征又取去數百人及劉崇北遁遣禁兵千餘

屯京兆洪信益懼即請入朝懇辭藩鎮拜左武衛上將軍世宗初遷左驍衛顯德五年改右龍武軍統軍從北征為合流口部署宋乾德五年改左驍衛上將軍開寶五年致仕八年卒年七十四洪信以外戚致位將相歛財累鉅萬時節鎮皆廣置帳下親兵惟洪信最寡少弟洪義

李洪義洪信弟漢祖鎮太原補親校漢初授護聖左廂都校領岳州防禦使遷侍衛馬軍都指揮使領武信

軍節度隱帝改鎮寧軍會誅楊邠史宏肇時侍衛步
軍都指揮使王殷屯澶州即遣供奉官孟業賈宓詔
令洪義殺之又令護聖都指揮使郭崇害周祖於鄴
洪義素怯懦慮殷覺遷延不敢發遽引業見殷殷乃
錮業送宓詔於周祖洎周祖起兵詔扼河橋周祖兵
至洪義降周廣順初權知宋州節度尋真拜歸德軍
加同平章事權知許州歲餘改鎮安州顯德初加檢
校太師世宗兼侍中尋徙青州六年夏遷京兆尹永

興軍節度恭帝加開府階宋初加兼中書令移鄜州
乾德五年代歸卒年五十九贈太師

李廷珪并州太原人七歲隸孟知祥帳下後從入蜀知
祥僭號補軍職累遷奉饗肅衛都虞候拔階州令領
兵二萬出子午谷援鳳翔始出谷聞趙贊為王景崇
所逼遂退軍權知興元累遷閬州保寧節度護聖控
鶴都指揮使周師攻秦州以廷珪為北路行營都統
秦成階三州竟不能守復為左右衛聖諸軍馬步軍

都指揮使俄加兼侍中蜀成都巡檢使改遂州武信
軍節度領本鎮及保寧軍都巡檢使王全斌下劍關
景遣廷珪與其子元喆將兵來拒至綿漢狼狽而還
所經州縣盡焚其儲蓄歸闕賜錢三百萬以償川中
田宅直為右千牛衛上將軍乾德五年卒

張永德字抱一并州陽曲人不曾孫事繼母劉以孝聞
周祖初為侍衛吏與其父穎善乃以女妻永德永德
迎其母妻詣宋州周祖為樞密使表供奉官押班乾

祐中命賜潞帥常遇生辰禮幣遇周祖之外兄弟也
時周祖鎮鄴被讒永德聞有密詔授遇探知其意謂
遇曰願且以永德屬吏事成足以為德不成死未晚
遇令壯士嚴衛然餽之甚厚未幾周祖使至遇賀且
謝曰老夫幾誤大事遂送永德歸周祖周初封妻為
晉國公主授永德左衛將軍內殿直小底四班都知
加駙馬都尉領和州刺史逾年擢殿前都虞候領恩
州團練使俄遷殿前都指揮使泗州防禦使時年二

十四顯德元年世宗戰高平大將樊愛能何徽退劔
時宋太祖與永德各領牙兵二千永德部下善左射
厲兵分進大捷降劉崇軍七千餘及駐上黨世宗書
卧帳中召永德曰前日之戰主將殊不用命吾將案
之以法永德曰今止固守封疆則已必欲開拓疆宇
威加四海宜痛懲其失世宗擲枕於地大呼稱善翌
日誅二將以徇軍威大振進攻太原永德與符彥卿
史彥超北控忻口契丹援兵至彥超戰沒繼敗其衆

二千餘衆遁去以永德領武信軍節度師還徙義成軍時永德父穎為隸人曹澂所害因奔南唐會議南征永德請自効至壽春劉仁瞻堅壁不下永德出疲兵誘之傍伏精騎每戰陽不利北退三十里伏兵突起夾攻大敗之仁瞻僅以身免三年世宗親征至壽州仁瞻檻送澂等三人詔賜永德俾其甘心太祖與永德領前軍至紫金山吳人列十八砦壘西有高隴下瞰其營永德選勁弓強弩伏隴旁太祖麾兵直攻

第一砦戰陽不勝淮人果空砦出關永德亟登隴發
伏馳入據之敵衆散走翌日又攻第一砦鼓譟而進
始攻北門淮人開南門遁時韓令坤在揚州遣永德
率師援之又敗泗州軍千餘於曲溪堰俄屯下蔡時
吳將林仁肇帥衆千餘水陸齊進又以船數艘載薪
乘風縱火將焚周浮梁俄而風反永德進兵敗之又
夜使習水者沒其船下縻以鐵鑠引輕舸急擊吳人
既不得進溺者甚衆奪數十艘永德解金帶賞習水

者乃距浮梁十餘步以鐵索千餘尺橫截長淮又維
巨木自是備禦益堅俄又敗千餘衆於淮北岸獲船
數十艘吳人多溺死詔褒美之冬擢殿前都點檢四
年從克壽州還授檢校太尉領鎮寧軍節度五年夏
命率步騎二萬拒契丹還駐澶淵解兵柄加檢校太
尉同中書門下平章事恭帝時移鎮忠武宋初加兼
侍中永德入朝授武勝軍節度召對後苑每呼駙馬
不名時并汾未下太祖密訪其策永德曰太原兵少

而悍加以契丹為援未易取也臣以每歲多設游兵
擾其農事仍發間使以諜契丹絕其援然後可下也
上然之俄歸鎮會討金陵永德造戰船數十艘運糧
萬斛自順陽沿漢水而下富民高進豪橫寘於法進
潛詣闕誣永德命樞密都承旨曹翰領騎兵察之得
其實翰以進授永德永德遽就市笞而釋之時稱其
長者太平興國二年來朝拜左衛上將軍五年降大
將軍數月復舊秩六年進封鄧國公雍熙中連知滄

雄定三州端拱元年節度安化召還為河北兩路排
陣使屯定州嘗與遼戰斬獲甚衆二年內艱起復淳
化初知鎮州二年改泰寧軍兼侍中出判并州兼并
代都部署永德明天文術嘗與僚佐會食有報遼兵
寇州境者永德用太白萬勝訣占之語坐客曰彼雖
以年月便利乘金而來反值歲星對逆兵家大忌必
敗未幾折御卿捷報至衆始歡伏轉運使王嗣宗言
其販茶闌出罷為左衛上將軍真宗初進衛國公尋

判左金吾街仗事咸平初授太子太師分司西京仍以其孫大理寺丞文蔚釐務洛下以便就養二年冬將北巡以永德宿將召入對賜坐訪以邊要留為東京內外都巡檢使三年授檢校太師彰德軍節度知天雄軍俄以耄還鎮秋卒年七十三遣內園使馮守規護柩還贈中書令諸孫遷秩者五人文蔚至虞部員外郎文炳殿中丞

羅彥瓌太原人父全德晉沁州刺史彥瓌蔭補內殿直

開運初幸澶州欲賞詔宣慰大名城中特選勇敢士
十人彥瓌應募銜枚夜發衝突而入往返如期補興
順指揮使後契丹命送殿馬千匹赴幽薊至元氏聞
漢祖起以馬歸太原漢祖嘉之入汴擢護聖指揮使
周初由散員都虞候累遷馬步軍都軍頭從向訓收
秦鳳有功遷散指揮都虞候陳橋之變太祖自仁和
門入俄頃宰相范質等至尚未及對彥瓌挺劍而前
厲聲曰我輩今日必得天子太祖叱之不退質等由

是降階聽命擢控鶴左廂都指揮使改內外馬軍都
軍頭領眉州防禦使從平澤潞破李筠衆於碾子谷
還為侍衛步軍都指揮領武信軍節度使建隆二年
出鎮彰德軍乾德二年復改安國軍與李繼勳大破
契丹兵四年春又與田欽祚破太原軍于靜陽擒其
將鹿英明年移鎮華州開寶二年卒年四十七

吳延祚字慶之并州太原人事周祖為親校廣順初授
莊宅副使遷內軍器庫使知懷州入為皇城使苻彥

卿鎮大名以延祚權知鄆州世宗初遷右羽林將軍
充內客省使尋拜宣徽北院使征劉崇為北面都巡
檢使權判澶州加右監門衛大將軍俄遷宣徽南院
使判河南府知西京留守事汴河決督丁壯數萬塞
之增築堤防自汴城至臨淮數旬訖工世宗北征權
東京留守夏河決鄭州原武發近縣丁壯三萬餘塞
之為左驍衛上將軍檢校太傅樞密使恭帝加檢校
太尉宋初加同中書門下三品征李筠延祚曰潞城

岫險且阻太行賊據之未易破也筠素勇而輕若速擊之必離上黨來邀我戰猶獸亡其藪魚脫於淵因可擒矣太祖遂行以延祚留守東京兼判開封府筠果領兵來戰澤州南敗走討李重進又為東京留守建隆三年夏為雄武軍節度秦州夕陽鎮西北多材植高防知州議就置采造務西夏酋尚波于率衆爭奪令延祚代防賫詔赦尚波于等夏人感悅是年秋以伏羌地來獻乾德二年改鎮京兆開寶四年來朝

俄疾駕臨問命執艾炙其腹尋卒年五十四贈侍中
官給葬事延祚謹厚寡言性至孝母喪絕水漿累日
好學聚書萬餘卷治家嚴尤奉釋氏子元輔元載元
範元辰元吉元慶元範元慶皆禮賓副使元吉閣門
祇候元吉子昭允太子中舍元慶子守仁內殿崇班
吳元輔字正臣延祚子好學善筆札周廣順中補供奉
官世宗遷洛苑使宋初授左驍衛將軍澶州巡檢累
官定州鈐轄卒年四十八子昭德昭遜昭普並閣門

祇候

王溥字齊物并州祁人祚子漢乾祐中舉進士甲科為
秘書郎周祖討三叛辟從事河中平得朝貴及藩鎮
交結書將按之溥諫魑魅之形伺夜而出日月既照
氛沴自消願一切焚之以安反側周祖從之師還遷
太常丞從鎮鄴廣順初授左諫議大夫樞密直學士
二年遷中書舍人翰林學士三年加戶部侍郎改端
明殿學士拜中書侍郎平章事宣制畢周祖曰吾無

憂矣世宗將親征濁路獨贊成之凱還加兼禮部尚書監修國史世宗嘗從容問曰漢相李崧以蠟書與遼信有之耶溥曰崧為大臣設有此謀肯輕示外人蓋蘇逢吉誣之耳乃詔贈其官將討秦鳳求帥于溥溥薦向拱事平世宗因宴酌酒賜溥曰為吾擇帥成邊功者卿也從平壽春加階爵顯德四年丁艱起復四表乞終喪乃入謝六年夏命參知樞密院事恭帝加右僕射冬表請修世宗實錄遂奏扈蒙張淡王格

董淳同加修纂從之宋初進位司空罷參知樞密院
乾德二年罷為太子太保舊制一品班臺省後上因
見溥謂左右曰溥舊相當寵異之即令分東西班遂
為定制五年服闋加太子太傅開寶二年遷太子太
師中謝太祖曰溥十年作相三遷一品福履之盛近
世未見其比太平興國初封祁國公七年八月卒年
六十一輟朝二日贈侍中謚文獻溥性寬厚美風度
好汲引後進所荐至顯位者甚衆好學手不釋卷嘗

集唐會要百卷五代會要三十卷有集二十卷子貽
孫貽正貽慶貽序貽正至國子博士貽慶比部郎中
貽序景德二年進士後改名貽矩至司封員外郎貽
孫累遷右司郎中尤知名貽正子克明

伊審徵字申圖并州人父延瓌隨孟知祥入蜀知祥以
女妻之僭封崇華公主延瓌歷陵嘉眉三州刺史審
徵至孝母病割股肉啖之以父任歷蜀州刺史雲安
權鹽使廣政十四年召為通奏使知樞密院事久之

領蜀州刺史命檢校城砦俄領武泰軍節度選其子
崇度尚公主又改節寧江同平章事與王昭遠並掌
機務昶事無大小咸咨之常自以康濟經畧為已任
宋師入境首奉降表授靜難軍節度乾德六年移鎮
延安開寶未入朝改右屯衛上將軍太平興國二年
判右金吾衛仗雍熙五年卒年七十五

慕容延釗太原人父章襄州馬步軍都校領開州刺史
延釗少以勇幹聞隸周祖帳下補西頭供奉官歷尚

食副使鐵騎都虞候世宗授殿前散指揮使都校領
溪州刺史高平之戰督左先鋒有功陞虎捷左廂都
指揮領本州團練使遷殿前都虞候領睦州防禦使
征淮南改龍捷左廂都校沿江馬軍都部署歸為殿
前都虞候出為鎮淮軍都部署顯德五年世宗駐迎
鑿江口聞吳水艦數百泊東沛洲進為左神武統軍
命引驍騎由陸路進宋延偓督舟師沿江繼之遂大
破敵淮南平遷殿前副都指揮使領淮南節度使恭

帝改鎮寧軍充殿前副都點檢與宋祖同官友善宋
祖常兄事之復為行營馬步軍都虞候以先鋒重兵
屯於真定宋初遣使諭旨許以便宜從事加殿前都
點檢同中書門下三品數遣問勞猶以兄呼之延釗
按治邊境以鎮靜聞征李筠與王全斌由東路會兵
進俄為行營都部署知潞州行府事平加兼侍中還
澶州建隆二年來朝賜宅一區徙山南東道節度西
南面兵馬都部署冬大寒賜貂裘百子氈帳四年春

為湖南道行營前軍都部署時被病御封藥以賜令
肩輿即戎賊將汪端與衆數千擾朗州擒之磔於市
荆湘平加檢校太尉冬卒年五十一贈中書令追封
河南郡王錄其子德業至衛州刺史德鈞至尚食副
使弟延忠內殿直歷供奉西頭官都知磁州刺史延
卿至虎捷都指揮使

李進卿并州晉陽人以驍勇隸護聖軍晉天福中杜重
威敗安重榮於宗城力戰有功擢興順軍校周祖命

成靈壽久之遷龍捷指揮使顯德初從戰高平改鐵
騎歷散員左射都校鐵騎內殿直都虞候宋初領貴
州刺史三遷鐵騎左廂都指揮使領乾州團練使遷
控鶴領漢州虎捷領澄州伐蜀為歸州路行營步軍
都指揮使拔巫山砦下夔萬二州拜侍衛親軍步軍
都虞候領保順軍節度使親征河東留為在京都巡
檢還改親軍馬軍都虞候遷步軍都指揮使改節靜
江卒年五十九贈侍中子延信內殿崇班

楊美并州文水人本名光美避諱省狀貌雄偉武力絕人以豪俠自任周祖征三叛杖策詣軍門與語壯之留帳下廣順初累遷禁軍大校世宗征淮南以功擢鐵騎都指揮使領白州刺史與宋祖故舊即位授內殿直都知建隆三年為北海軍使政尚簡易民咸德之乾德二年召還北海民詣闕乞留詔諭之不去答為首者始罷遷馬步都頭討蜀為歸州路戰擢左右廂都指揮使蜀平遷內外馬步軍副都軍頭領恩州

團練使改領端州防禦使加都軍頭領宣州觀察使
俄授虎捷左右廂都指揮使領河西軍節度使征太
原為行營馬軍都虞侯太平興國二年出為保靜軍
節度使以疾解官詔遣內使與道士馬志視之卒年
四十八贈侍中命中使護葬美任氣好施凡得賜予
及俸祿盡調親故死之日家無餘財人多嘆息之

王守忠晉陽人父審琦周封陳王守忠累官衛州刺史
入宋知興元太宗時歷知數州累遷威德軍觀察留

後為治簡靜喜與士大夫游時論多之

常延信并州平晉人祖思周昭義歸德平盧三鎮節度
延信補牙職領和州刺史思卒人為六宅使建隆初
改領平州坐事貶右監門衛副率領護滑州黃河隄
開寶中為汴河南巡檢出為潼關監軍關路巖險奏
易道路及填禁院役工四十餘萬又監通許鎮兵改
梓遂十二州都巡檢使賜袍帶錢百萬太平興國初
再任賜錢四十萬捕殺亡命百餘人又為唐鄧都巡

檢代還改右清道右司禦雍熙三年督鎮州北蜀糧
冬為全邵六州都巡檢使令疾置之任就充羊狀六
峇都鈐轄遷右衛副率馳入溪洞索誠州蠻歸款要
領又直趨古鎮過西延大水諸洞蠻人惴伏淳化中
歷襄鄧宋曹等州都巡檢使改左監門衛將軍屢部
徒修護河防改左領軍左屯衛充西京水南都巡檢
使擒彭婆鎮甲馬營盜咸平中歷太康鞏縣二監軍
景德二年卒年六十四

王全斌并州太原人幼穎敏其父事唐莊宗為岢嵐軍使私畜勇士百人莊宗召之懼不敢行全斌時年十二請以已為質果獲全因隸帳下莊宗入洛累遷內職同光之難近臣宿將皆遁全斌獨與符彥卿等居中拒戰明宗初補禁軍列校晉初從侯益破張從賓遷護聖指揮使周廣順初為龍捷右廂都指揮使討慕容彥超為行營馬步都校從向拱平秦鳳領恩州團練使遷領泗州防禦從世宗平淮南復瓦橋關改

相州留後宋初與慕容延釗由東路會大軍進討李
筠以功拜安國軍節度使詔完葺西山堡砦不踰時
而就建隆四年與郭進等克樂平乾德二年伐蜀拜
忠武軍節度西川行營前軍都部署率禁軍步騎二
萬諸州兵萬人由鳳州路進討召示川陝地圖授以
方略奏曰臣等仗天威遵廟謨刻日可定上曰卿能
如此吾復何憂十二月率兵拔乾渠渡萬仞燕子二
砦遂下興州蜀刺史藍思綰退保西縣敗蜀軍七千

獲糧四千餘萬斛進拔石圖魚關白水二十餘砦先
鋒史延德進軍三泉敗蜀軍數萬擒招討韓保正副
使李進獲糧三十餘萬斛既而崔彥進康延澤等逐
蜀軍過三泉遂至嘉陵俘獲甚衆蜀人斷閣道軍不
能前議取羅川路延澤彥進謂其路險軍難並進不
如分兵沿閣道與大軍會於深渡全斌然之命二將
督治數日而成進擊金山砦破小漫天砦全斌繇羅
川趣深渡與彥進會蜀人依江列陣以待彥進遣張

萬友等奪其橋會暮蜀人退保大漫天砦詰朝彥進
延澤萬友分三道進擊蜀人悉其精銳來逆戰又大
破之乘勝拔其砦蜀將王審超監軍趙崇渥遁去復
與三泉監軍劉延祚樞密王昭遠澤州節度使趙彥
韜引兵來戰三戰三敗追至利州北昭遠遁渡桔栢
江焚其梁退守劔門遂克利州得糧八十萬斛自利
州趨劔門次益光時京城大雪上設氍毹于講武殿
衣紫貂裘帽視事謂左右曰我被服若此體尚覺寒

念西征將士衝犯霜雪何以堪處即解裘帽遣中黃
門馳賜全斌仍諭諸將曰不能徧及也全斌拜賜感
泣會諸將議曰劔門天險宜各陳進取之策侍衛軍
頭向韜曰降卒年進言益光江東越大山數重有狹
徑名來蘇蜀人於江西置砦對岸有渡自此出劔關
南二十里至清強店與大路合於此進兵即劔門不
足恃也全斌即欲卷甲赴之延澤曰來蘇細徑不須
主帥親往且蜀人屢敗并兵退守劔門命一偏師趣

來蘇若達清強北擊劔關與大軍夾攻破之必矣全
斌納其策命史延德分兵趨來蘇造浮梁于江上蜀
人見梁成棄砦而遁昭遠聞延德兵趨來蘇至清強
即引兵退陣於漢源坡獨留偏將使守劔門全斌等
擊破之昭遠彥韜皆走遣輕騎獲送闕下遂克劔州
殺蜀軍萬餘四年正月師次魏城孟昶遣使奉表降
全斌等入成都旬餘劉廷讓等始自峽路至昶餽遺
及犒師並同全斌詔書頒賞諸軍亦無差降由是兩

軍相嫉帥亦不協全斌雖小事不能即決會詔發蜀
兵赴關遂有全帥確之擾分兵招輯賊衆始息召還
令中書問狀責授崇義軍觀察留後開寶末幸洛陽
郊祀召入侍祠面諭曰朕以江左未平慮征南諸將
不遵紀律故抑卿數年為朕立法今已克金陵還卿
節鉞授武寧軍節度使仍以銀器萬兩帛萬匹錢千
萬賜之至鎮數月卒年六十九贈中書令天禧二年
錄其孫永昌為三班奉職全斌輕財重士不求聲譽

寬厚容衆軍旅樂為用黜居山郡十餘年怡然自得
識者稱之

王審鈞全斌子由崇儀使領富州刺史為廣州兵馬鈐
轄轉永興軍駐泊都監以擊賊死弟審銳供奉官閤
門祇候

郭守文并州太原人父暉漢護聖軍使從周祖征河中
戰死守文年十四居喪哀毀周祖召隸帳下廣順初
補左班殿直遷東第二班副都知宋初遷西頭供奉

官選知簡州時劔外多寇胥招來之從征嶺南會擒
劉銀遷翰林副使從平金陵護送李煜歸闕好語慰
之煜心遂安改西京作坊使領翰林司事俄從党進
破并寇於團栢谷太平興國初乘傳撫諭蕃部西夏
悅伏三年遷西上閣門使夏汴水決寧陵董宋亳丁
壯四千五百塞之冬又護塞靈河縣決河征太原分
護行營馬步軍會劉繼文據代州討平之俄護定州
屯兵大破遼于滿城以功遷東上閣門使領澶州刺

史召拜內客省使八年滑州房村河決命塞之率禁
兵數萬援碓州遼人遁去雍熙二年屯三交領武州
團鍊使破夏州鹽城鎮岌羅臆等十四族斬首數千
級俘獲生畜萬計又破咩族戩焉銀麟三州歸附
者凡百二十五族萬六千餘戶西鄙遂寧五年春為
幽州道行營前軍步軍水陸都監為遼流矢所中氣
色不撓督戰益急軍中服其量坐退軍左遷右屯衛
大將軍明年復職拜宣徽北院使又為北面排陣使

屯鎮州端拱初改南院使鎮州路都部署又為北面
行營都部署兼鎮定高陽關兩路排陣使冬大破遼
騎于唐河端拱三年卒年五十五贈侍中謚忠武追
封譙王遣中使護喪歸葬守文沉厚有謀畧朝退習
書百行出言溫雅未嘗忤人意故岐溝既敗命以內
職總兵鎮常山經畧之中使言守文死軍士皆流涕
上問何得此對曰守文得俸祿賜賚悉攜勞士卒死
之日家無餘財上嗟嘆之賜其家錢五百萬為真宗

納其女為夫人即章穆后也子崇德太子中舍崇信
西京左藏庫使同知皇城司贈福州觀察使諸司使
無廢朝贈官例崇信崇儼咸特示優禮崇德子承壽
虞部員外郎天禧五年錄承壽子若水為太常寺奉
禮郎崇仁為解州團練使

袁繼忠振武人徙并州父進周階州防禦使繼忠蔭補
右班殿直宋平澤潞討并汾悉預攻戰征蜀隸劉廷
讓有功知雲安軍歷嘉蜀二州監軍伐廣南為先鋒

壕若遷供奉官護隰州白壁關屯兵累入河東境破
三砦近成主將懼無功以所獲分與之改天平軍巡
檢太宗初遷閭門祇候擊破梅山洞賊又巡遏邊部
於唐龍鎮從征太原預破鷹揚軍先登陷陣遼師入
代境擊走之遷通事舍人護高陽關屯兵破遼師長
城口殺獲數萬璽書褒美趙保忠獻地綏州刺史李
克憲偃蹇遣繼忠諭旨竟率克憲入朝遷西上閭門
副使定河西諸州大破西人於葭蘆州遷引進副使

護定州屯兵遷西上閣門使雍熙三年為定州路行
營馬步軍都監從田重進取飛狐下靈邱平蔚州擒
其帥大鵬翼師還殿後行列甚整重進欲殺降卒繼
忠救免之遷判四方館事領播州刺史易州靜塞騎
兵尤驍果李繼隆取隸麾下既而契丹陷靜塞城盡
俘騎兵妻子繼隆疑軍怨已欲分隸諸將繼忠曰不
可但奏升其軍額優以廩給使之盡節可也衆皆感
悅繼忠因自請隸麾下會遼師駐唐河北諸將欲堅

壁待之繼忠曰今疆敵在近城中屯重兵不能剪滅
顧令長驅深入豈折衝禦侮之道乎我將身先士卒
死於寇矣辭氣慷慨衆壯之靜塞軍推鋒先入遼師
大潰璽書獎諭厚賜予之遷引進使護鎮定高陽關
兩路屯兵卒年五十五繼忠長厚忠謹士大夫多與
遊前後賜賚鉅萬悉以攜士既死家無餘蓄子用成
雍熙初第進士至太常博士

安守忠字信臣并州晉陽人父審琦周平盧節度使封

陳王晉天福中領山東道署牙內指揮使領繡州刺
史顯德四年改鞍轡庫使初下淮南命馳往宣諭抗
以止禮無所辱命改衛州刺史宋祖居潛雅相厚善
即位授左衛將軍自處益謙及從征太原多與謀畧
人罕知之建隆四年湖南平命為永州刺史乾德中
護河陰屯兵蜀平特命知興元府尋改漢州刺史朝
使旁午出私錢給用太祖每戒使者言守忠在蜀能
律已以正汝行見之當效其為人開寶初改濮州副

曹翰塞澶州決河五年知遼州部民陰召并人斬以
狗九年入賊境燔砦四十餘議將深入會班師太平
興國初移知靈州雍熙二年改易州徙夏州每西戎
犯邊戰無不捷錄功就拜濮州團練使端拱中知滄
州又知瀛州兼高陽關駐泊部署遷瀛州防禦使淳
化二年徙雄州方宴軍校擐甲及閤守忠言笑自若
徐顧坐客曰此輩酒狂爾擒之可也人服其量尋加
耀州觀察使條陳邊事稱旨賜錢五百萬五年移滄

至道初復移雄三年復移滄拜威德軍節度觀察留
後徙宋州兼制置營田使威德兼著吏民不忍其去
咸平三年入覲遣還卒年六十九贈太尉錄其子繼
昌供備庫副使壻王世及光祿寺丞守忠謹慤淡薄
為治簡靜樂施予豐宴犒且喜從士大夫遊時論多
之以父愛妓為隸人所戕終身不蓄嬖妾而尤嗜佛
云

山西通志卷一百五

欽定四庫全書

史部

山西通志卷一百六

詳校官監察御史_臣查善長

檢討_臣德生覆勘

總校官進士_臣朱鈐

校對官學正_臣常循

謄錄監生_臣徐汝雄

欽定四庫全書

山西通志卷一百六

人物 六

太原府

宋

呼延贊并州太原人父琮周淄州馬步都指揮使贊少
為驍騎卒太祖以其材勇補東班入承旨遷驍雄軍
使從討西川當前鋒身中數創以功補副指揮使太

平興國初親選軍校以為鐵騎軍指揮使從征太原
先登乘城及堞而墜者數四賜金帛獎之俄從崔翰
戍定州翰言其勇擢馬步軍副都軍頭稍遷內員僚
直都虞侯獻陣圖兵要及樹營砦之策求領邊任召
見自陳武藝具裝執鞭馳騎揮鐵鞭棗槊旋繞廷中
數四又引其四子必興必改必求必顯以入更迭舞
劍槊槊賜白金衣帶端拱二年領富州刺史再加都
軍頭為保州刺史冀州副都部署改遼州刺史復為

都軍頭領扶州刺史加康州團練使咸平二年從幸
大名為行宮內外都巡檢上嘗補軍校皆叙已功贊
獨進曰臣月俸百千所用不及半忝幸多矣不敢更
求遷擢再拜而退三年卒贊有膽勇鷙悍輕率常言
願死於敵徧文其體為赤心殺賊字至妻孥僕使皆
然諸子耳後刺曰出門忘家為國臨陣忘生為主所
作破陣刀降魔杵鐵折上巾兩旁有帛皆重十數斤
絳帕首垂騅馬冬月嘗以水沃狹幼冀長耐寒而勁

健必顯後擢副都軍頭

吳元載廷祚子建隆初授太子右春坊通事舍人賜緋魚袋廷祚鎮秦雍補衙門都校後授供奉官太平興國三年加閣門祇候使遼九年擢西上閣門副使出知陝州雍熙三年徙秦州州民李益為長道縣酒務官家饒財僮奴數千指長吏皆畏之民負息錢郡為督理推官馮伉不從益遣奴拽下馬毀辱之伉屢表不得達後因市馬譯者附表以聞詔元載逮捕權貴

已報益益亡命物色急捕之獲於河中府民郝氏家
御史府具得其狀斬之益子光祿寺丞仕衡除籍民
皆飯僧相慶端拱初遷西上閣門使淳化二年領富
州刺史俄徙知成都府王小波擾不能捕滅受代歸
時李仕衡通判華州遣人閱行裝元載拒之仕衡抗
章疏其罪坐責郢州團練副使移單州授左衛將軍
致政卒年五十三子昭明內殿崇班昭矩太子中舍
楊業并州太原人父信漢麟州刺史業幼個儻任俠善

騎射畋獵恒倍獲嘗曰我他日用兵亦猶用鷹犬逐
雉兔爾弱冠事劉崇為保衛指揮使以驍勇聞累遷
建雄軍節度使屢立戰功所向克捷國人號為無敵
太宗征太原素聞其名嘗購求之既而業勸其主繼
元降上遣中使召見業大喜以為右領軍衛大將軍
授鄭州刺史上以業老於邊事復遷代州兼三交駐
泊兵馬都部署密封橐裝賜予甚厚會遼師入鴈門
自西陁出由小陁至鴈門北口南嚮背擊之遼師大

敗以功遷雲州觀察使仍判鄭州代州自是遼人望
見業旌旗即引去主將戍邊者多忌之或潛上謗書
上皆不問封其奏以付業雍正三年北征命業副潘
美為雲應路行營都部署以西上閣門使王侁軍器
庫使劉文裕護其軍諸軍連拔雲應寰朔四州師次
桑乾河會班師美等歸代州未幾詔遷四州民於內
地令美等以所部兵護之時遼復陷寰州業謂美等
曰宜領兵出大石路先遣人密告雲朔州俟大軍離

代州日令雲州衆先出我師次應州即令朔州民出城直入石碣谷遣強弩千人列谷口以騎士援於中路庶保萬全侁曰但趨鴈門北川中鼓行而往文裕亦贊成之業曰不可此必敗之勢也侁語侵之業曰業非避死蓋時有未利徒令殺傷士卒而功不立今君責業以不死當為諸公先將行泣謂美曰此行必不利業太原降將分當死上不殺寵以連帥授之兵柄非縱敵不擊蓋伺其便將立尺寸功以報國恩今

諸君責業以避敵業當先死於敵因指陳家谷口曰
諸君於此張步兵彊弩為左右翼以援俟業轉戰至
此即以步兵夾擊救之不然無遺類矣旣陣谷口使
人望之以為遼師敗走欲爭其功即領兵離谷口美
不能制業力戰至暮果至谷口望見無人即再率帳
下士力戰身被數十創士卒殆盡業猶手办數十百
人馬重傷遂為遼人所擒其子延玉亦沒焉業太息
曰上遇我厚期討賊捍邊以報而為姦臣所迫復何

面目求活耶乃不食三日死上聞之痛惜甚下詔曰
執干戈而衛社稷聞鼓鼙而思將帥盡力死敵立節
邁倫不有追崇曷彰義烈故雲州觀察使楊業誠堅
金石氣激風雲挺隴上之雄才本山西之茂族自委
戎乘式資戰功方提貔虎之師以效邊陲之用而羣
帥敗約援兵不前獨以孤軍陷於沙漠勁果森厲百
死不回求之古人何以加此是用特舉徽典以旌遺
忠魂而有靈知我深意可贈太尉大同軍節度賜其

家布帛千匹粟千石大將軍潘美降三官監軍王侁
劉文裕胥除名業不知書忠烈武勇有智謀練習攻
戰與士卒同甘苦代北苦寒但挾纊露坐理軍事傍
不設火侍者殆僵仆而業怡然無寒色為政簡易御
下有恩故士卒樂為之用朔州之敗麾下尚百餘人
業謂曰汝等各有父母妻子與我俱死無益也可走
還報衆皆感泣不肯去淄州刺史王貴殺數十人矢
盡遂死餘亦死無一生還者聞者皆流涕朝廷錄其

子供奉官延朗崇儀副使次子殿直延浦延訓供奉
官延環延貴延彬殿直

馬峰并州太原人仕劉繼元至樞密使左僕射致仕太
原平為將作監遷太府卿分司西京峰善服餌養生
體強無疾頗好持論雍熙元年卒年八十餘

王貴并州太原人廣順初補衛士宋初累遷散員都指
揮使馬步軍都軍頭領勝州刺史太平興國二年為
淄州刺史從潘美止征攻沁州立戰功及從楊業射

殺遼兵數十人矢盡張空券又擊殺數人遂遇害年
七十三擢其子文晟供奉官文昱殿直

張繼能字守拙并州太原人父贊晉內班繼能建隆初
以黃門事禁中太平興國初為內品從征河東主城
南洞屋遷高品為高陽鎮定路先鋒都監從崔彥進
戰長城口多所俘馘明年又與彥進敗遼於唐興口
轉殿頭高品雍熙中監李繼隆軍徙護定州屯兵領
驍捷卒三千屯五回嶺端拱初遷入內殿頭從趙保

忠討李繼遷保忠薦其材命同經畧代還掌內弓箭
庫淳化三年與白承睿護芻粟入靈武命領驍卒五
千同諸將主軍務俄為本州都監城威州清遠軍護
其役工畢命同張延洲知軍事又同田紹斌掌積石
砦遷內供奉官靈環慶清遠軍後陣都監轉鬪敗西
人復還清遠遷內殿崇班供備庫副使復護環州屯
兵徙涇原儀渭都巡檢使真宗遷崇儀使靈環十州
軍兵馬都監兼巡檢安撫使咸平三年為川陝兩路

招安巡檢使成都平留為利州招安巡檢復為邠寧
駐泊都監坐清遠軍陷又焚棄青岡砦流儋州景德
二年赦為內侍省內常侍又為陝西捕賊巡檢獲千
餘人改內殿崇班朝陵為行宮四面巡檢四年討宜
州卒陳進為廣南東西路安撫副使賊平授供備庫
使東封留為舊城內巡檢鈐轄加東染院使大中祥
符二年擢入內內侍省副都知時宗室說書給公膳
專遣主之俄提點郡縣主諸院事三年兼羣牧都監

祀汾陰留掌大內兼舊城內巡檢鈐轄領會州刺史
謁太清宮為天書扶侍都監七年為涇原儀渭鎮戎
軍兩路鈐轄徙廊延都鈐轄先是內屬戶殺漢口者
止罰孳畜繼能則麗於常法繇是西人不敢犯日課
卒截竹為簽署字其上備將士記殺獲功狀賊聞之
甚懼歸朝復蒞羣牧仁宗在儲宮嘗親書一幅賜之
繼能以聞真宗亦為標題其末人以為榮九年左授
西染院使掌往來國信天禧初復西京左藏庫使坐

事降授西京作坊使出為邠寧鈐轄掌瑞聖園尋領
往來國信所三年復西京左藏庫使內侍右班副都
知遷崇儀使轉內園使掌瓊林苑五年卒年六十五
特贈汀州團練使錄其子懷忠大理寺丞孫逖三班
奉職遜借春坊祇候繼能性沉密知兵喜讀書而好
治生云

慕容德豐字日新延釗次子幼聰悟八歲父鎮山南補
衙內指揮使父卒授如京使征太原領御砦南面巡

檢征南唐為洞子都監尋為昇州都監以廉潔聞俄
領蔚州刺史太平興國二年知愛州兼邠寧都巡檢
使嘗破小遇族奪名馬數十匹詔褒諭居任九年簡
靜為治邊鎮安之雍熙四年使登萊閱強壯還拜西
上閣門使出為定遠軍鈐轄命領後陣中隊別將萬
騎以禦邊屢知邢延二州又代侯延廣知靈武就賜
白金三千兩改四方館使徙慶州又改靈州兼部署
殺貴出私廩賑饑全活者衆轉引進使賊入境擊走

之咸平二年遷客省使知鎮州遼南侵繕兵固守餉饋不絕詔獎之改知滄州德豐輕財好施厚享將士身居邊陲母與妻孥尚留京貧甚特給團練使俸尋進潁州團練使知貝瀛二州五年卒年五十五家無餘財子惟素至殿內承副

慕容德琛延釗從子蔭補供奉官累遷內殿崇班知夔州李順黨張餘領衆十萬舟千艘來寇與戰龍山斬首千餘級又與白繼贊擊斬二萬餘悉焚其舟賊剽

開州圍雲安德琛往援又斬百餘級累詔褒諭歷西
京作坊左藏副使咸平二年轉崇儀荆湖北路鈐轄
蠻擾澧鼎境與戰於北汭奪耕牛鎧甲斬馘以歸徙
峽路鈐轄未至復知夔州景德中領梧州刺史復任
峽路遷莊宅使并代鈐轄知憲州天禧初改右監門
衛大將軍

尹憲并州晉陽人開寶中事太宗藩邸即位擢殿直充
延州保安軍使改供奉官太平興國四年護府州屯

兵與鄜州三族會攻嵐州破敵千餘擒知州馬延忠
拔緣河諸砦以功轉西京作坊副使入朔州界破寧
武軍殺其軍使獲人馬器甲甚衆轉供備庫使護夏
州兵殺戮三泐醜奴莊岌伽羅膩葉十四族及誘其
渠帥屢降詔書褒美雍熙初就知夏州攻破地斤澤
李繼遷遁走俘獲四百餘帳憲奏請抽移諸帳於所
部別置騎兵號曰平砦以備用詔從之俄殺盧關及
南山野狸數族代還為洪州巡檢尋護莫州屯兵三

年知瀛州兼兵馬鈐轄淳化初為四方館使連護鎮
定屯兵改知貝州移高陽關兵馬鈐轄五年知定州
與部署王榮不協榮毆憲仆因疾卒年六十三

劉通并州人曾祖質絳州刺史祖維嶽父延慶右驍衛
將軍通嘗從潘美征廣南又累戰北面積勞至虎捷
都指揮使領嘉州刺史太平興國中扈蹕太原卒贈
潁州防禦使長女為真宗妃大中祥符五年妃正位
累贈維嶽天平軍節度中書令兼尚書令延慶彰化

軍節度許國公通太師尚書令魏王謚武懿累追封
祖母宋氏安國太夫人母河南縣君元氏育國太夫
人妻龐氏晉國太夫人女婿龔知進贈衛尉卿知進
妻追封南安郡君初通窆汴城西天禧二年七月具
鹵簿鼓吹改葬於祥符鄧公原后親臨奠真宗御製
祭文置靈坐右

吳元辰字君華廷祚子太平興國八年尚蔡國公主授
左衛將軍駙馬都尉明年領愛州刺史進團練使雍

熙三年表求試劇郡命知鄆州尋知河陽還朝改鄆
州觀察使特詔朝會序班次節度使祿賜悉增之再
知河陽淳化五年秋霖河溢城將壞元扆躬涉泥滓
督工補塞民多構木樹抄命濟以舟楫設餅餌以食
時澶陝悉罹水災河陽賴以安真宗初換安州觀察
使知澶州咸平三年轉運使劉錫上其治狀詔嘉獎
遷寧國軍留後知定州時王超王繼忠踰唐河與遼
戰元扆度其必敗急發州兵護河橋超輩果敗遼人

乘之至橋見陣兵甚盛遂引去考滿吏民詣闕貢馬
疏其善政十事願借留樹碑表德政詔褒之屬歲旱
吏白召巫以士龍請雨元辰曰巫本妖民龍止獸也
安能格天惟精誠可以動天乃設壇潔齋三日百拜
祈禱澍雨沾洽景德三年代歸拜武勝軍節度三年
為修諸陵都部署出知潞州初并代澤潞皆分轄戍
卒後并於太原至是以元辰臨鎮遂分領澤潞晉絳
慈隰威勝七州軍戎事委元辰專總之加檢校太傅

知徐州大中祥符四年改領山南東道卒年五十贈
中書令謚忠惠子弟進秩者五人五年葬時上元欲
觀燈上為移次夕元扈性謹讓待賓佐以禮喜讀春
秋左氏聲色狗馬不介意祿賜即給親族公主乳媪
得入參宮禁元扈慮其妄有請託白上拒之真宗深
所嘉嘆於駙馬中獨稱其賢及歿甚悼惜之子守禮
六宅使澄州刺史以國甥特贈和州防禦使守嚴內
殿崇班天禧中錄守嚴子承嗣承緒殿直守良內殿

崇班守讓閤門祇候

楊延昭本名延朗後改焉業之子也幼沉默寡言多戲
為軍陣業曰此兒類我征行必從太平興國中補供
奉官業攻應朔延昭為先鋒戰朔州城下流矢貫臂
鬪益急以崇儀副使知景州為江淮南都巡檢使改
崇儀使知定遠軍徙保州緣邊都巡檢使就加如京
使咸平二年冬遼攻遂城城小無備長圍數日遼蕭
后督戰衆心危懼延昭悉集城中丁壯登陴賦器甲

護守會大寒汲水灌城上旦悉為冰堅滑不可上遼人潰去獲鎧仗甚衆以功拜莫州刺史屢請益兵於傅潛不許及潛抵罪名赴行在屢得對訪以邊要上甚悅指示諸王曰延昭父業為前朝名將延昭治兵護塞有父風深可嘉也厚賜遣還是冬遼南侵延昭伏銳兵于羊山西自北掩擊且戰且退及西山伏發遼衆大敗獲其將函首以獻進團練使與保州楊嗣並命上謂宰相曰延昭等並出踈外以忠勇自效朝

中多忌朕力保庇以及此五年遼侵保州延昭與嗣
未成列為遼所襲命李繼宣王何代之上曰延昭素
以勇聞當觀其後效六年夏遼復侵望都繼宣逗遛
復命延昭為都巡檢使條上防秋利害又徙寧邊軍
部署景德元年詔益延昭兵滿萬人如遼騎入寇則
屯靜安軍東令莫州部署石普屯馬村西以護屯田
斷黑盧口萬年橋奔衝路仍會諸路兵犄角追襲令
魏能張凝田敏竒兵牽制之時王超為都部署不聽

隸屬延昭上言遼師頓澶淵去北境千里人馬俱乏
雖衆易敗凡有剽掠率在馬上願飭諸軍扼其要路
衆可殲焉即幽易數州可襲而取不報乃率兵抵遼
境破古城俘馘甚衆及請和選邊州守臣御筆命知
保州兼緣邊都巡檢使二年追叙守禦勞進防禦使
俄徙高陽關副都部署在屯九年大中祥符七年卒
年五十七延昭智勇善戰所得俸賜悉攜軍未嘗問
家事出入騎從如小校號令嚴明與士卒同甘苦遇

敵必身先行陣克捷推功于下故人樂為用在邊防
二十餘年遼人憚之目為楊六郎及卒上嗟悼之遣
中使護櫬歸河朔人多望柩而泣錄三子官常從門
客亦試藝敘之

鄧守恩并州人十歲以黃門事太宗淳化中從王繼恩
討成都盜至道初就護西蜀屯兵咸平初以大內高
班為鎮定都監入掌駢院龍騎卒剽環慶往擒翦
之景德初為瀘漢都巡檢又使環慶戎瀘巡察邊事

大中祥符初按獄濮州雪寃人十餘預監修玉清昭
應宮會靈觀七年兼修真遊殿景靈宮累遷大內高
品供奉官宮成遷內殿承制八年預修大內改西京
作坊副使九年營造皆畢授東染院使充會靈觀都
監天禧二年掌軍頭引見司修祥源觀成遷崇儀使
三年授大內押班為修滑州決河鈐轄改如京使還
任四年春河復故道遷文思院使歸領昭州刺史掌
皇城國信二司整肅禁衛遷大內副都知會建天章

閣命領其事又勾當資善堂兼春坊司守恩長七尺
狀貌甚偉泣事幹敏以彊果稱五年卒年四十八贈
淄州防禦使錄其子官

劉美通子初事真宗於藩邸以謹力被親信即位補三
班奉職再遷右侍禁咸平中傳潛流房州擇美監軍
潛徙穎又為陳頴巡檢嘗遣美廉陳州石保吉美曰
保吉營繕過度拙於檢下誠或有之自餘保無他患
上意乃解充閣門祗候大中祥符二年護屯兵漢州

歷遷供奉官徙嘉州撫循士卒有恩改內殿崇班提
點在京倉場東西八作司以舉職聞遷洛苑副使八
年預修大內以勞改南作坊使同勾當皇城司天禧
初遷洛苑使領勤州刺史與周懷政聯職未嘗阿附
親從卒偵邏按籍分番均使焉三年授龍神衛四廂
都指揮使領昭州防禦使改侍衛馬軍都虞候五年
加武勝軍節度觀察留後卒年六十廢朝三日贈太
尉昭德軍節度錄其二子旁親遷補者數人追封妻

宋氏河內郡夫人仁宗贈侍中子從德字復本美卒年十四自殿直遷供備庫副使後以崇儀使真拜恩州刺史改和州又遷蔡州團練使出知衛州薦縣吏李熙輔於朝后喜曰兒能薦士知所以為政矣即日擢京官從事鄭驥亦擢美官改恩州兵馬都總管知相州從德妻王蒙正女蒙正至郎官為郡守既而從德卒年二十四贈保寧軍節度使封榮國公諡康懷錄內外姻戚門人及僮隸數十人從德娣堦龍圖閣

直學士馬季良母越國夫人錢氏兄唯演子集賢校
理賧及蒙正皆遷二官戴融嘗佐從德衛州以為三
司度支判官御史曹修古楊偕郭勸推直官段少連
論之胥坐貶

李延渥晉鄉子蔭補供奉官尋為閣門祗候三遷西京
左藏庫使咸平初歷知平戎寧邊順安軍保州威虜
軍鈐轄又知冀州六年徙瀛州景德元年十月遼師
抵城下四面夾攻延渥率州兵強壯又集巡檢史普

所部乘城發礮石巨木擊之皆纍纍而墜殺傷甚衆
翼日遼主與其母親鼓衆急擊延渥分兵拒守益堅
遼人遁去死者三萬餘傷倍之獲鎧甲兵矢竿牌數
百萬賜錦袍金帶將士緡錢遷本州團練使初成棚
垂板護城纜數寸許遼師射之矢集其上凡二百餘
及請葺城詔取板視之上亟稱其勞二年徙知邢州
歷天雄軍貝州副都部署知冀貝博三州大中祥符
八年以疾換右領軍衛大將軍領濱州團練使明年

以左武衛大將軍致仕天禧初卒子宗禹內殿崇班
王貽永字季長溥孫性清慎寡言不好聲伎生十餘歲
時舅魏咸信見而竒之曰後當類我咸平中尚鄭國
公主授右衛將軍駙馬都尉從封泰山領高州刺史
再遷右監門衛大將軍獎州團練使求外補得知單
州真宗曰和衆靜治所當先也真拜洺州團練使徙
徐州河決徐大水作隄城南以禦之改衛州進懷州
防禦使知澶定二州徙成德軍遷耀州觀察使復知

澶州歷彰化武定軍節度使觀察留後拜安德軍節
度使出知天雄軍徙節保寧知鄆州州介梁山多水
患貽永相度地勢為築東西道三十餘里民便之復
徙定州又徙成德擢同知樞密院事改副使加宣徽
南院使進樞密院使久之拜同中書門下平章事加
兼侍中徙節鎮海以疾求罷遣上醫診視上臨問頒
尚方珍藥手取糜粥飲之貽永願罷樞筦解使相上
冀其愈聽罷侍中徙節彰德同平章事樞密使如故

疾稍間入見命其子道卿掖登垂拱殿賜五日一朝
遇朝參許休殿側至和初復以疾辭拜尚書右僕射
檢校太師兼侍中景靈宮使卒贈太師中書令諡康
靖貽永能遠權勢在樞密十五年迄無過失人稱其
謙靜道鄉西上閣門使

狄棐字輔之陽曲人唐相仁傑十四代孫徙長沙少以
文謁路振振器愛之妻以女第進士以大理評事知
分宜縣歷開封府司錄知璧州為寇準所厚薦通判

益州擢開封府判官歷京西益州路轉運江淮制置
發運使累遷太常少卿知廣州加直昭文館代還不
以南海物自隨人稱其廉拜右諫議大夫龍圖閣直
學士權判吏部流內銓出知滑州進給事中徙天雄
軍坐公事降知隨州徙同州勾當三班院進樞密直
學士歷知陝鄭州河中河南府復判流內銓出知揚
州未行卒棊在河中中貴人言將援棊棊答以他語
泣政愷悌不為表襮卒之日家無餘貲

王信字公亮太原人家故饒財少勇悍大中祥符中盜起晉絳澤潞數州信應募籍軍與其徒生擒賊七十人以功補龍神衛指揮使部使者薦召閱武藝遷御前忠佐軍領河中府同華鄜延丹坊州慶成軍管界捉賊又遷龍衛都虞候兼鄜延巡檢劉平石元孫戰歿信以所部兵薄賊斬數十級遷捧日都虞候改西京作坊使知鎮戎軍徙保安軍兼鄜延路兵馬都監始至敵衆數萬夜薄城軍吏氣懾信領勁兵三千出

南門與戰失其前鋒因按兵不動遲明潛上東山整
軍乘勢而下擊走之多獲首級馬牛遷鈴轄兼經畧
安撫招討都監領貴州刺史葛懷敏敗信出兵拒敵
俘斬甚衆進保州刺史就遷馬步軍都總管遂為招
討副使累遷馬步軍都虞侯象州防禦使徙高陽關
路王則變明鎬奏為貝州城下都總管城破則遁執
之拜感德軍節度觀察留後召為步軍副都指揮使
卒贈武密軍節度兼侍中

王凱字勝之從祖審鈞僑京兆饒于財散施結客日馳
獵南山下尹寇準見而竒之言全斌取蜀有勞審鈞
又死忠義當錄其孤遂為三班奉職監鳳翔整屋稅
歷左右班殿直監益州市買院轉慶州合水鎮兵馬
監押監在京草場又自右侍禁雄州兵馬監押擢閣
門祇候定邢趙都巡檢使徙麟州都監嘗出雙烽橋
染枝谷遇夏人破之又破龐青黃羅部再戰于伺候
烽前後斬三百餘級獲馬牛橐駝器械以數千計夏

人圍麟州垂城拒鬪晝夜三十一日始解去遷西頭
供奉官代還為內殿崇班麟州路緣邊都巡檢使護
糧道于青眉浪寇猝大至與同巡檢張岳相失乃分
兵出其後夾擊之復與岳合斬首百餘級又入兔毛
川遇賊三萬凱兵祇六千陷圍中流矢中面鬪不解
斬首并自蹂踐死者以千數內侍宋永誠哭于軍劾
罷之遷南作坊副使改并代州鈐轄管勾麟府軍馬
事夏人二萬寇青塞堡凱出鞋邪谷轉戰四十里至

杜胙川大敗之得所掠馬牛以還經畧明鎬上其功
領資州刺史會平甘陵盜拜澤州刺史知邠州澤州
團練使歷環慶并代定州路副都總管神龍衛四廂
捧日天武四廂都指揮使綿州防禦使累遷侍衛親
軍步軍副都指揮使涇州觀察使又徙秦鳳路入辭
諭以唃氏木征交易阻絕宜安靜以處之至則與主
帥撫以恩信遂復常貢召拜武勝軍節度觀察留後
侍衛親軍馬軍副都指揮使卒年六十六贈彰武軍

節度使謚莊恪凱篤于故舊治軍有紀律善撫士卒
平居與均飲食臨陣毅然不少假故士卒畏服戰無
不力前後與敵遇未嘗挫衄子緘

石普太原人唐河中節度雄之後自幽州徙祖全周鐵
騎軍使父通事晉邸普十歲給事邸中以謹信見親
補寄班祇候遷東頭供奉官捕獲永興賊邢橐馳賈
禿指數百人遷內殿崇班帶御器械為西川行營先
鋒討平李順遷西京作坊使領欽州刺史順餘黨稱

印南王又為西川都提舉捉賊使入奏面陳致亂由
賦斂苛急農民失業宜稍蠲減之使自為生則不討
而自平許之普即還蜀揭榜諭上意蜀人悅服賊平
賜白金三千兩襲衣金帶鞍勒馬遷洛苑使領富州
團練使延州緣邊都巡檢使追殺羌也羽王均亂為
川峽路招安巡檢使從雷有終擊破賊于天回鎮圍
益州城繕車砲又為地道攻城均平進冀州賜黃金
三百兩白金三千兩特命兼帶御器械為保州兵馬

鈴轄北面行營押策先鋒戰廉良城長城口獲俘馘
器甲甚衆徙定州路副都總管靈州失守徙永興軍
上言臣嘗將兵輒破一錢與別將各持其半用相合
為信上乃置傳信牌又獻禦戎圖請設塹以陷敵馬
并上所置戰械甚衆徙莫州總管望都敗令統軍一
萬屯莫州浚靜戎順安軍營田河道徙屯順安西與
魏能楊延昭田敏猗角掌御劔內侍馮仁俊與普不
叶上召仁俊還又令率所部屯乾寧軍徙冀州總管

澶淵之役王繼忠遣人持信箭遺普且通密表和議
成遷容州觀察使廊延路副總管趙德明納款普言
不宜授以押蕃落使名目恐總制屬羌強橫將不可
制乃止兼管內蕃落使徙并代路改桂州觀察使鎮
州路總管遷保平軍節度觀察留後幸汾陰還至陝
駐蹕城中賜詩令扈從拜河西軍節度使知河陽徙
許州築大流堰引河通漕京師上軍機條目二卷用
將機宜要訣二圖上言聞哨廝囉欲陰報曹瑋請以

所獻陣圖付瑋可使必勝會請罷醮設歲省緡錢七千餘萬王欽若乘機構之除名貶賀州聽挈家以行甫至授左清道率府副率稍復左千牛衛將軍遷左領軍衛大將軍仁宗遷左屯衛又降將軍歷左千牛左屯衛大將軍自蔡州起知信陽軍徙光州復貶左監門車府副率居滁州尋以左衛將軍分司西京給官第居蔡州遷大將軍卒普性倜儻有膽畧凡預計伐聞敵即馳赴西平蜀盜大小數十戰衆推其勇通

兵書陰陽六甲星歷推步之術太宗嘗謂普剛驚少
合然藉其善戰每厚遇之後值忌日必盡室詣佛寺
齋薦以為常

夏守恩字君殊并州榆次人父遇武騎軍校與契丹戰
歿補守恩下班殿侍給事襄王宮遷西頭供奉官真
宗初四遷至北作坊使普州刺史從幸澶淵數見任
使遷博州刺史歷龍神衛捧日天武四廂都指揮使
秦州防禦使章獻預政以守恩領親兵倚用之擢殿

前都虞侯天聖初以安遠軍留後管勾殿前馬步軍
都指揮使加步軍副都指揮使威塞軍節度使為永
定陵總管雷允恭誅徙節河陽三城歸鎮知澶相曹
三州并代路馬步軍都總管歷天雄泰寧武寧三節
度使為真定府定州路都總管通判李參發其賊編
管連州卒

夏守贇字子美守恩弟幼召入襄王宮稍長習通文字
真宗初授右侍禁命往綏夏伺察李繼遷西頭供

奉官寄班祗候幸大名為駕前走馬承受時康保喬
戰沒部曲畏誅言保喬降賊守贊受密詔變服往廉
得其情還奏詔恤其家移承受真定路幸澶淵汾陰
皆為駕前巡檢遷綾錦副使幸亳州修行宮轉崇儀
使提舉倉草塢甚見親信遷西上閣門使提舉諸司
庫務以右千牛衛大將軍昭州刺史為樞密都承旨
兼領三班院每遼使至與楊崇勳迭為館伴凡十餘
年擢侍衛親軍殿前步軍都虞候改馬軍并代州都

總管累遷步軍馬軍殿前副都指揮使建武鎮東保
大軍節度使除殿前都指揮使徙節定國又徙鎮海
罷管軍踰年徙定州路都總管寶元二年召知樞密
院事上問西事守贊言宜併小障兵以據衝要伺便
邀擊功或可成上然之辨劉平石元孫之枉自請將
兵擊賊換宣徽南院使陝西馬步軍都總管兼經畧
安撫緣邊招討使命以御劔隨之尋詔駐軍河中居
數月徙屯鄜州康定元年召同知樞密院事以子隨

卒請罷以宣徽南院使天平軍節度連判澶相二州
復為真定府定州等路都總管徙高陽闕判瀛州卒
贈太尉謚忠僖

郭承祐字天錫從義曾孫娶舒王元偁女授西頭供奉
官補左清道率府率春坊左謁者真宗為玉石小牌
二勒銘以戒飭之仁宗初遷西染院副使兼閤道通
事舍人勾當翰林司遷西上閤門副使坐事編管徙
許州別駕起率府率遷西京作坊使勾當右騏驎院

進六宅使象州團練使承祐多言事指切人過失同
列謂之武諫官真授衛州刺史知相州入為羣牧副
史改濰州團練使歷知曹鄭澶鄆貝州徙澶州兵馬
總管役卒有異謀廉得不待奏捕斬之再知澶州入
為龍神衛四廂都指揮父喪起真定府定州等路副
都總管諫官歐陽修余靖論之改知相州尋徙大名
府副都總管樞密使杜衍奏罷軍權為相州觀察使
永興軍副都總管改知邢州徙河陽兵馬總管衍去

復為殿前都虞侯并代州副都總管兼知代州徙邢
州諫官錢明逸論之改相州徙秦鳳路副總管累遷
建武軍節度使殿前副都指揮使尋以宣徽南院使
判應天府府壁壘不完盜至卒無以禦承祐始城南
關浚沙灘盟三河徙亳州諫官論之罷宣徽許州都
總管徙節保靜軍知徐州轉運使蘇舜元薦之改知
鄭州卒贈太尉謚密

閻守恭并州榆次人父榮個儻有志畧劉繼元欲召至

帳下辭不就守恭體貌竒偉劉氏平徙太原民於大名府因僑家焉往來負販并汾間過西山聞郭進為都巡檢使慨然曰進不遇主亦行伍爾吾豈不及進邪遂應募隸拱聖軍擢殿前押班咸平中從幸河北以功為捧日副指揮使歷拱聖龍衛捧日指揮使累遷左第二軍乾州刺史明道中以德州刺史為永興軍兵馬鈐轄徙并代路守恭性沉勇御軍嚴雖家居如對賓客常訪求士大夫取郭進事師法之俸祿悉

散子人在并州因春社會客曰守恭太原一貧民爾
徒步位刺史老復官鄉里踰分多矣今日與卿輩訣
後十日卒

劉從廣字景元美次子始生補西頭供奉官還內殿崇
班侍仁宗左右後真拜崇州團練使娶荆王元儼女
為滌州防禦使時年十七自言夏釁起不能扞疆場
坐耗縣官願上所給公使錢上嘉納之為羣牧都監
改副使特拜宣州觀察使同勾當三班院請補外知

洺州漳水溢穿隨故渠以殺水勢洺人便之徙邢州
籍鄉軍罷老者聽引子弟自代著為令名領三班院
出知襄州徙正定府路馬步軍副都總管卒贈昭慶
軍節度使謚良憲從廣性謹飭喜交士大夫當時稱
之

劉永年字君錫從德子生四歲授內殿崇班仁宗使賦
小山詩有一柱擎天語上誤投金杯瑤津亭下戲曰
能取之乎永年一躍持出上拊其首曰奇童子也常

置內中年十二始聽出外累遷廉州團練使為陝州都監郭邈山等為盜密遣壯士夜渡河殺其渠二十餘人衆遂散遷鈐轄擢幹辦皇城司改單州團練使永興軍路總管副張昇使遼遼人夜取巨石塞驛門手擲棄之遼人驚以為神出知涇州賜詩寵之郡兵歲以香樂為折支三司不時輦致振武卒突入通判聽事請以他物代給語不遜召至庭下數其罪斬二人餘不敢動同提舉在京諸司庫務知代州遼取西

山木焚之一夕盡上稱善遼移檄捕縱火盜永年曰盜固有罪然發在我境何須汝事乃不敢復言上嘗問禦戎策對合旨書忠孝字以賜英宗遷沂州防禦使復知代州歷步軍馬軍殿前都虞侯太原定州路副都總管征安南請先士卒渡富良江不許遷扈州觀察使步軍副都指揮使卒贈崇信軍節度使謚曰莊恪

牛拱辰文水人天聖進士歷倅岢嵐定襄遷駕部員外

賜三品服進虞部郎中知房陵所至去苛細而寬約
束清心潔已未嘗為子孫業

潘夙太原人天聖中上書論時政授仁壽簿歷知韶滑
桂州累遷河北轉運使知河中府章惇察訪荆湖討
蠻徭夙陳憂邊狀知潭州再遷光祿卿知鄂州

丁億嵐縣人天聖朝進士任樞密使文武兼全恩威并
著弊革而獄平化行而民安

高若訥字敏之并州榆次人僑衛州進士及第補彰德

軍節度推官改秘書省著作佐郎再遷太常博士知
商河縣縣有職分田牛種皆假於民獨廢不耕御史
知雜楊偕薦為監察御史裏行遷尚書主客員外郎
殿中侍御史裏行改左司諫同管勾國子監遷起居
舍人知諫院范仲淹奪職歐陽修移書責之未幾加
直史館以刑部員外郎兼侍御史知雜事王蒙正知
蔡州若訥言蒙正起裨販因緣戚里得官向徙郴州
物論猶不平今予之大州可乎詔寢其命大慶殿設

祈福道場言大慶殿非禮不御非法服不坐國之路
寢也豈可聚老釋為瀆慢閣文應為入內都知言其
肆橫不法請出之遂出文應又言二府對纜數刻何
以盡萬幾宜賜坐從容如唐延英故事擢天章閣待
制知永興軍留判吏部流內銓出為河東路都轉運
使召還兼侍讀權判尚書刑部母服除加龍圖閣直
學士史館修撰以右諫議大夫權御史中丞時宰相
賈昌朝與叅知政事吳育數爭事明年旱言陰陽不

和責在宰相洪範大臣不肅則雨不時若昌朝及育
皆罷若訥代育為樞密副使王則據貝州或議招降
言河朔重兵所積今釋不討後且啓亂階及破城議
貸知州張得一言守城不死自當誅况為賊屈得一
遂棄市以工部侍郎叅知政事為樞密使凡內降恩
多覆奏不行入內都知王守忠欲得節度使固執以
為不可坐前駟毆斃路人皇祐五年罷觀文殿學士
兼翰林侍讀學士尚書左丞同羣牧制置使判尚書

都省卒贈右僕射諡文莊若訥彊學善記自秦漢以
來諸傳記無不該通尤喜申韓管子書明歷學通醫
書雖國醫皆屈服張仲景傷寒論訣孫思邈方書及
外臺秘要久不傳悉考校訛謬行之名醫多出衛州
皆本高氏學皇祐中以漢貨泉度一寸依隋書定尺
十五種上之并損益祠祭服器悉施用有集二十卷
范雍字伯純世家太原曾祖仁恕蜀宰相祖從龜刑部
侍郎入朝改右屯衛將軍僑河南雍中進士第為洛

陽主簿累官殿中丞知端州遷太常博士寇準辟河
南通判還判三司開拆司河決滑州選京東轉運副
使歷河北陝西轉運使入為三司戶部副使又徙度
支以尚書工部郎中為龍圖閣待制陝西都轉運使
還提舉諸司庫務勾當三班院為環原州安撫使建
言屬羌罰羊舊輸錢而比年責使出羊羌人頗患之
請輸錢如舊罪輕者以漢法贖金從之遷右諫議大
夫權三司使論平滑州水患勞加龍圖閣直學士明

年拜樞密副使母憂起遷給事中王清昭應宮災雍
抗言小殿僅存不若悉燔之如因其所存又將繕葺
之則民不堪命非所以畏天戒也遂詔勿葺遷尚書
禮部侍郎罷為戶部侍郎知陝州改永興軍歲饑加
賑恤請知河陽進吏部徙應天府又改河南進資政
殿學士陳安邊六事請天雄軍聚甲兵以備河北永
興軍河中府益募士兵以備陝西即涇原環慶有警
河中援之既而元昊拒命拜振武軍節度使知延州

請益師不報元昊光遣人通款雍信之一日破金明
砦乘勝至城下劉平石元孫夜戰三川口大敗雍閉
門堅守左遷戶部侍郎知安州居一歲復吏部知河
中府又復資政殿學士知永興軍兼轉運司事遷尚
書左丞加大學士初完永興城詔止其役雍匿詔而
趨成之明年賊犯定川永興獨不憂寇復徙河南遷
禮部尚書卒贈太子太師謚忠獻雍為治尚怒喜薦
士後多至公卿狄青為小校時坐法當斬雍貸之子

宗傑兵部員外郎直史館歷陝西轉運使卒子子奇
楊文廣字仲容延昭子以班行討張海有功授殿直范
仲淹宣撫陝西與語奇之置麾下從狄青南征知德
順軍為廣西鈐轄知宜邕二州累遷左藏庫使帶御
器械治平中上以文廣名將後且有功擢成州團練
使龍神衛四廂都指揮使遷興州防禦使秦鳳副都
總管韓琦使築篳篥城文廣聲言城噴珠率衆急趨
篳篥比暮至其所部分已定遲明敵騎大至知不可

犯而去遺書曰當白國主以數萬精騎逐汝文廣襲之斬獲甚衆或問其故答曰此必爭之地彼若知而據之則未可圖也詔褒諭賜襲衣帶馬知涇州鎮戎軍為定州路副都總管遷少軍都虞侯遼爭代州地界文廣獻陣圖并取幽燕策未報而卒贈同州觀察使

盧政太原文水人為神衛都軍頭從劉平戰延州寇薄西南隅兵不得成列政引數騎挑戰發伏弩二百射

却之日暮政說平曰今處山間又逼汗澤宜速退保
後山湏明決關不然彼夜出乘高感我何以禦之平
不聽遂敗政脫身歸及黃德和誣平政言平被執非
降也因自陳失主將當死上義其言赦之以為供奉
官德州兵馬監押預討貝州率勇敢數百飛纆絳牒
而登守者莫能亢大軍乘以入遷內殿承制征懷智
高有功歷秦鳳高陽關都鈐轄累遷捧日天武四廂
都指揮使三衛都虞侯副都指揮使涇原定并代四

路副都總管累轉祁州團練昌州防禦黔州觀察使
拜武泰軍節度使時年七十三氣貌不衰侍立殿下
雖久無惰容能上馬踴躍觀者壯之卒贈開府儀同

三司

武英字漢傑太原人父密侍禁鎮定同巡檢戰歿望都
贈西京左坊使錄英三班借職以右班殿直為忻代
州同巡檢州將出獵敵乘間引百餘騎來寇英領衆
左右馳射悉擒獲之以功轉左班殿直監碓州權場

改右侍禁閣門祇候為環州都巡檢使徙洪德砦主
又徙慶州柔遠砦元昊寇延州英主兵攻後橋以分
敵勢擢內殿承制環慶路駐泊都監破黨平族又從
任福破白豹城遷禮賓副使尋兼涇原行營都監與
福合戰張家堡諸將皆趨利英度前必有伏衆不聽
伏果發福敗英猶力戰自辰至申矢盡傷重遂遇害
贈邢州觀察使錄子永符東頭供奉官永孚西頭供
奉官永昌左侍禁姪永保左班殿直永錫三班奉職

夏隨字君正守贊子慎重少過頗好儒多與士大夫游
初蔭殿侍為率府副率仁宗初除內殿承制歷閣門
使出為天雄軍兵馬鈐轄出知衛州徙邠州累遷秦
州防禦使為廊延路副都總管徙環慶復還廊延獲
元昊偽書錦袍銀帶以遺金明李士彬隨力辨其行
間士彬感激擊賊自效轉耀州觀察使知亳州劉平
敗徙知河中以父為經畧留領會靈觀事守贊還復
為陝西副都總管兼緣邊招討副使卒贈昭信軍節

度使諡莊恪

安俊字智用太原人祖贊高州團練使仁宗開資善堂
俊以將家子謹厚選為祇候即位補右班殿直累遷
東頭供奉官閤門祇候為環州都監破元昊吃江井
那諸砦韓琦上其功遷內殿崇班環慶路都監徙涇
原與狄青范恪同名使備北邊擢內園副使改禮賓
使會葛懷敏敗命為秦鳳路鈐轄復徙涇原條上禦
戎十三事再改原麟州遷六宅使貴州刺史再知忻

代州帥臣誣奏降京東路鈐轄知青州富弼為辦理
真除虢州刺史徙高陽關路又遷原州刺史知滄涇
冀三州秦州築古渭城徙秦鳳路總管歷龍神衛捧
日天武四廂都指揮使果州團練使環慶路副總管
遷侍衛步軍都虞候陵州防禦使卒贈閬州觀察使
俊在邊久故羌人識之种世衡嘗問降俘若屬於吾
將誰畏曰畏安太保指俊於坐曰此長髯將軍是也
楊察字隱甫其先晉人從唐僖宗入蜀僑成都祖鈞從

孟昶歸朝父居簡真宗時都官員外郎宦廬州又僑
合肥察幼孤七歲始能言母知書自教之景祐元年
舉進士甲科除將作監丞通判宿州遷著作郎直集
賢院出知潁壽二州入為開封推官判三司鹽鐵度
支勾院修起居注歷江南東路轉運兼按察使行部
數擿奸隱衆皆畏伏尤以舉官為急務不效俗吏掎
拾羨餘召為右正言知制誥權判禮部貢院時請罷
糊名考士及變文格察奏防禁一潰則奔競復起且

文無今昔惟以體要為宗若肆其瀟漫亦非唐氏科
選之法議遂寢避妻父晏殊嫌換龍圖閣待制母服
除復知制誥拜翰林學士權知開封府遷右諫議大
夫權御史中丞論事無所避言舉御史格太密恐英
偉之士或有所遺又言御史故事許風聞縱所言不
當繫朝廷采擇近何郊以疑似遽令中書詰問臣恐
臺諫官畏罪緘默非所以廣言路也又數以言事忤
宰相陳執中尋坐失出罷知信州復以侍讀學士徙

揚州兼龍圖閣學士知永興軍加端明殿學士知益州遷禮部侍郎權知開封府復兼翰林學士權三司使內侍楊永德毀察於帝三司有獄辭連衛士詔移開封鞠之察乞罷遷戶部侍郎兼三學士提舉集禧觀進承旨踰年復充三司使察遇事明決勤於吏職雖多益喜不厭癰發猶入對商畫財利歸而大頌人以為用神太竭卒贈禮部尚書謚宣懿察美風儀敏於屬文為制誥皆雅緻有體當世稱之有文集二十

卷九子庶嗣

楊畋字樂道太原人保靜軍節度使重勛之曾孫第進士授秘書省校書郎并州錄事參軍再遷大理寺丞知岳州慶歷三年湖南徃唐和劫掠州縣擢殿中丞提點本路州獄專治盜賊事戰孤疑峒前軍勦畋躡巖下卒厲衆平六峒以功遷太常博士尋坐部將胡元歿降知太平州歲餘賊益肆御史按視還言珍賊非畋不可乃授東染院使荆湖南路兵馬鈐轄賊聞

改至皆走嶺南又詔往韶連等州招安之乃約賊使
出峒授田為民而轉運使欲授以官與貲改曰賊飽
貲糧據峒穴其勢不久必復亂明年春賊果復出陽
山改即領衆出嶺外涉夏秋凡十五戰賊平願還舊
官改尚書屯田員外郎直史館知隨州召還為三司
戶部判官奉使河東父艱會儂智高陷邕州召至賜
服飾御中入對便殿即日除起居舍人知諫院廣南
東西路體量安撫經制賊盜改至韶州賊勢愈熾坐

落知諫院知鄂州再降屯田員外郎知光化軍明年
又降太常博士徙邠州復起居舍人為河東轉運使
入為三司戶部副使遷吏部員外郎使遼以曾伯祖
業嘗陷虜辭不行河北舊以土絹給軍裝三司使張
方平易以他州絹畋奏聞又密陳其不可久之擢天
章閣待制兼侍讀判吏部流內銓上言願擇宗室使
侍膳嘉祐三年冬河北地震明年日食正旦復疏宜
早立皇嗣以答天意改知制誥李珣自防禦使遷觀

察劉永年自團練使遷防禦使當草制封還詞頭因
言祖宗故事郭進戍西山董遵誨姚內斌守環慶與
強寇對壘各十餘年未嘗轉官移鎮重名器也今珣
等無尺寸功特以外戚故除之恐非祖宗意不報進
龍圖閣直學士復知諫院嘉祐六年大水畋上言洪
範五行傳簡宗廟則水不潤下又曰聽之不聽厥罰
常水臣愚以為萬機之聽必有失於審者七廟之享
必有失於順者惟積思而矯正之乃下其章禮官并

兩制考議遂詔南郊以太祖定配改溫成廟為祠殿
卒贈右諫議大夫畋出將家折節喜學問討蠻時家
問至即焚之與士卒同甘苦性清介謹畏每奏事必
發封數四而後上自奉甚約及卒家無餘貲特賜黃
金二百兩復賜講讀官御飛白書扇遣使特賜置其
柩

趙密字微叔太原清源人政和四年用材武試崇政殿
授河北隊將戍燕高宗開府檄統先鋒援汴建炎元

年從張俊討任城寇李昱俊遇伏密奔射斃數人乃
脫擢閤門祇候統靖勝軍平賊董青趙萬徐明等累
功轉武節郎左軍統領金陷揚州士民渡江衆數萬
密露立水濱麾舟濟之破苗傅赤心軍於臨平金入
明州殊死戰敗之進武功大夫陞統制紹興元年大
破李成馬進皆北遁賜金帶轉親衛大夫康州刺史
總管涇原馬步軍平張莽蕩尋入衛十年金侵亳宿
從俊營合肥出西路時水潦暴漲涉六晝夜始達宿

與敵遇敗之明年敵犯滌濠密進擊之且命張守忠以五百騎出全椒縣伏篁竹間敵疑宵遁密乃引兵出六丈河斷其歸路又敗之進中衛協忠大夫和州團練防禦使尋拜宣州觀察使為龍神衛四廂都指揮使主管侍衛少軍海寇朱明暴橫密授張守忠方畧曰海與陸異窮之則日月相持非策之善要在拊定之耳守忠用其計明降進定江軍承宣使崇信軍節度使轉太尉拜開府儀同三司明年領殿前都指

揮使獻酒坊六十六所錢十萬緡銀五萬兩助軍詔
獎之告老以萬壽觀使奉朝請隆興二年進少保致
仕俄再為殿前都指揮使敵聲言航海窺不為動迄
如所料和議成罷為醴泉觀使乾道元年九月致仕
卒年七十一贈少傅

金

郭文振字拯之太原人承安二年進士累官遼州刺史
充宣差從宜都提控治遼深得衆心興定三年遙授

中都副留守權元帥左都監行河東北路元帥府事
招降太原東山二百餘村遷老幼於山寨得壯士七
十分駐營柵防護秋穫奏若秋高無兵直取太原河
東可復優詔許之十月權右都監與張開合堅臺州
兵復取太原四年請升樂平縣為臯州壽陽縣西張
寨為晉州從之上疏曰揚子雲有言御得其道則天
下狙詐咸作使御失其道則天下狙詐咸作敵有天
下者審所御而已河朔自用兵之後郡邑蕭然並無

官長武夫悍卒因緣而起以為得志僭越名位瓜分
角競以相侵攘雖有內除之官亦不得領其職所為
不法可勝言哉乞行帥府擅請便宜妄自誇張以尊
大其權包藏之心蓋可知也朝廷因而撫之假權傳
授至與各路帥府力侔勢均不相統屬陝西行省總
為節制相去遼遠道路梗塞卒難聞知故飛揚跋扈
無所畏憚鄰道相望莫敢誰何自平陽城破以來河
朔不置行省朝廷信臣不復往來布揚聲教但令戍

刺行報而已所司勞以酒食悅以貨財借其聲譽共
欺朝廷姦倖既行遂至驕恣變故之生何所不有此
臣所以夙夜痛心而為之憂懼也乞分遣公廉之官
徧詣訪察庶知所在利害之實伏見澤潞等處芻糧
猶廣人民猶衆地多險阻乞選重臣復置行省皆聽
節制上下相維可臂指使之則國勢日重奸惡不萌
矣時澤潞已詔張開規畫不能盡用其言二月封晉
陽公河東北路皆隸焉奏調協孟州提控伯特安事

遣近臣慰諭又奏武仙所統境土甚大雖與林州元帥府共招撫之乞更選本土州縣官重其職任同與安集可使還定宣宗用其策又薦葭州刺史瓜爾佳芬徹行嵐管隕石寧化保德諸州元帥府事從之元光元年林州行元帥府惟良得罪召還奏惟良在林州五年政尚寬厚大得民心今茲被召軍民遮路泣留其去未幾義兵之衆作亂遂招撫使康塘乞遣還林州為便不許文振上書乞遣前平章政事胥鼎行

省河北諸公府帥府並聽節制詔諭百姓使知不忘
遺黎之意然後以河南陝西精銳并力恢復不報復
秦河朔百姓引領南望臣再四請於樞府但以會合
府兵為言公府雖號分封力實單弱且不相統攝所
在被兵朝廷不即遣兵復河北人心將以為舉河朔
而棄之甚非計也大抵欲起胥鼎為行省定河北朝
廷不能用二年詔應援史詠復河東是歲遼州不能
守徙其軍於孟州以部將郝安等為副護沁山諸寨

累辭公府不許頃之部將汾州招撫使王遇與孟州防禦使納喇瑪古魯不相能復徙衛州自此不可以為軍迄正大間寓於衛而已

趙益太原人讀書肄業元兵入鳩合土豪保聚山峽屢戰有功晉陽公郭文振署壽陽令駐兵榆次重原寨遂率衆收復太原夜登城斬馘甚衆獲老幼二萬餘口馬仗不可計陞太原治中復擢同知府事兼招撫使元光元年八月元兵攻城益急知不可支乃焚府

庫殺妻子沉符印于井遂自殺贈銀青榮祿大夫河
東北路宣撫使仍求其子孫

段德祥陽曲人慈祥樂易遇事果敢金主聞其賢召至
奇其狀貌授定襄縣主簿兼本縣尉

劉海興州人舉進士第一人仕至河南府尹死于國難
子孫遂家河南焉

元

郝巴圖太原人善騎射通譯語太祖遣使宋往返數四

以辨稱從侵宋以功拜宣德等五路萬戶後還治太原凡遠道租稅過重者悉除之卒追封冀國公子天益天舉天澤皆至總管

張德輝字耀卿冀寧交城人少力學數舉於鄉及北渡史天澤辟經歷官從南征時軍士逃者必戮德輝言太過止配令穴城光州下葦山民結寨德輝曰鄉民為自保計當曉以禍福果相繼來降世祖在潛邸召見問曰孔子歿已久今其性安在對曰聖人與天地

終始無往不在殿下能行聖人之道性即在是矣又
問或云遼以釋廢金以儒亡有諸對曰遼事臣未敢
知金季乃所親睹宰執皆武弁世爵間用一二儒臣
及論軍國大計又不使預聞大抵以儒進者三十之
一然則金之淪亡自有任其咎者儒何與焉又問祖
宗法度德輝指銀槃喻曰當求謹厚者司掌乃永為
寶用又問農家對曰農桑天下之本衣食所從出今
男耕女織終歲勤苦而親民之吏復橫歛以盡之則

民鮮有不凍餒者矣問孔子廟食禮對曰尊崇與否
於聖人無所損益特以見時君崇儒重道之意耳又
問典兵宰民對曰莫如更遣宗室之賢如扣肯布哈
者使掌兵權勲舊如呼喇呼者使主民政則天下均
受賜矣及將還又陳先務七事曰敦孝友擇人才察
下情貴兼聽親君子信賞罰節用度切直多所開悟
尋與元裕壯覲請世祖為儒教大宗師世祖悅受之
因啟累朝有旨蠲儒戶兵賦即令行之仍命提調正

定學校世祖初命宣撫河東擊豪強黜賊吏均賦役
耆耄不遠千里來謁曰六十年不復見此太平官府
矣河東徭役官吏率賦一征十乃閱實戶編均其等
第出納有法汾晉地廣官世守吏結為朋黨得姦贓
尤甚者數十人械庭下數其罪惡杖出之所部肅然
考績為十路最陞見命疏所急務條四事曰嚴保舉
以取人財給俸祿以養廉吏易世官而遷都邑正刑
罰而勿屢赦帝嘉納焉遷東平路宣慰使奏免遠輸

豆粟二十萬斛和糶粟十萬斛同知寶合丁議官賦
璽絲令民稅而後輸德輝曰是誣上以毒下也且輸
納后期之責孰任之遂罷其事宜慰使巴爾議誅盜
賊德輝曰吾豈敢曲法從汝安殺乎至元三年召參
議中書省事或言沿邊將校冒代軍士將遣使按治
德輝奏曰若悉繩以法則人不自安今但易其部署
選武毅有才畧者任之則軍政自新委風憲官體究
則宿弊自革五年擢侍御史辭請老命舉任風憲者

疏烏庫哩真張邦彥圖克坦公履張家張肅李樂張昉
曹椿年西方賓周止高逸民王博文劉郁孫汝輯王
暉胡祇適周砥李謙魏初鄭辰凡二十人德輝剛直
博學有經濟器性不喜嬉笑與元裕李治游封龍山
時人號為龍山三老卒年八十

何榮祖字繼先太原人父瑛金貞祐間試文法入優等
補吏後授明威將軍守鉅鹿尹權軍器監主事因僑
廣平榮祖狀貌魁偉世業吏遂以吏累遷中書省掾

擢御史臺都事始折節讀書日記數千言阿哈瑪特置
總庫于其家號曰和市監察御史苑方等斥其非阿
哈瑪特知榮祖主之奏為左右司都事以隸己未幾御
史臺除治書侍御史升侍御史又出為山東按察使
阿哈瑪特不克逞僉事李唐卿劾特穆爾喇實貪墨遂
撫告唐卿縱反者榮祖得其情欲抵告者罪同鞠官
議以失口亂言之罪坐之榮祖不可俄遷河南按察
使卒杖其人唐卿之誣獲白平涼府言南人二十餘

輩遁行省欲上聞會榮祖為叅政止之曰何必上聞
去者皆人奴今遁往求其家移文召捕之可也已而
俱獲治以本罪其於事明決多類此除雲南行省叅
知政事以母老辭拜御史中丞復出為山東東西道
按察使時宣慰使樂實姚演開膠州海道糧舶遇暴
風多漂覆樂實督漕卒償之按察官莫敢言榮祖曰
第上奏若見譴吾自當之即草辭以奏詔免其徵召
人為尚書叅知政事時桑哥理筭錢穀榮祖數請罷

之不從屢懇請不已乃稍緩之而畿內民苦尤甚榮祖每以為辭同僚止之榮祖執愈堅至忤旨不少屈竟不署其牘未踰月而害民之弊皆聞上乃思榮祖言召問所宜榮祖請歲終立局考校人以為便立為常式詔賜鈔萬一千貫榮祖條中外百官規程欲矯時弊僧格抑不為通榮祖以病告特授集賢大學士尋起為尚書右丞僧格敗改中書右丞奏行所定至元新格請改提刑按察司為肅政廉訪司立監治法

又上言國家用度不可不足天下百姓不可不安今理財者弗顧民力之困言治者弗圖國計之大且當用之人恒多得用之人恒少省部實為根本必擇材而用之按察司雖監臨一道其職在除蠹弊安斯民苟有弗至則省臺又當遣官體察之庶有所益上深然之屢以老疾乞解詔免署事惟預議中書而食其祿尋拜昭文館大學士預中書省事又加平章政事先是定大德律令至是詔元老大臣聚聽之歸廣平

卒年七十九贈光祿大夫大司徒柱國追封趙國公
謚文憲榮祖僦第以居飲器用青瓷杯中宮賜以上
尊及金五十兩銀五百兩鈔二萬五千貫俾置器買
宅以旌其廉著大畜十集學易記載道集觀物外篇
等書子惠秘書少監

覃資榮其先懷來人父宣金末為定羌軍刺史沒於王
事資榮與弟資用子澄山阜相繼為交城令因占籍
焉資榮官至懷遠大將軍錫金虎符陞行元帥府事

資用官至定遠大將軍元帥左監軍

覃澄交城人資榮子襲職為交城令有文谷水分溉交
城田文陽郭帥專其利而堰之澄折以理令決水均
利於民請免僑民逋賦能來歸者復三年公私便之
歷官陝西四川道提刑按察使兼同知宣慰使封宏
農郡公謚忠宣弟山阜代令交城終知東勝州子克
修陝西漢中道提刑按察使贈禮部尚書追封宏農
郡侯謚文憲克思中山知府上騎都尉封宏農郡侯

山阜子克柔通使舍人克修子忠以南洛尹遷保德州同知陞南康府判次質兵部侍郎次文河南省宣慰使克思子敬漢陽知府

齊喇西域人世居太原由中書驛史從賽音諤德濟為雲南行省幕官諸洞款附嘗頒詔於緬緬王稽顙仕至資善大夫雲南行中書省左丞大德四年卒

郝佑字君輔小字都嚕巴爾台由宿衛補官仁宗時拜殿中侍御史以廉直著名被知遇遷陝西行省叅知政

事拜陝西行御史臺侍御史子忠恕翰林侍制獻所著無逸圖命總裁宋遼金三史成歸隱終身

王守誠陽曲人泰定初進士由秘書郎累官禮部尚書與修三史至正間使四川薦賢直枉為諸道最進行省左丞卒謚文昭所著有文集

劉濬字濟川興州人金狀元海曾孫繇廉訪司書吏調連江縣寧善鄉巡檢至正十三年江西賊帥王善寇閩官軍守羅源縣與連江接壤濬妻正定史氏故相

家女有才識謂濬曰事急矣可聚兵以捍一方於是
盡出奩中物募壯士百餘命仲子健將之決旬間衆
至數萬賊尋破羅源分兩道攻福州濬拒之辰山三
戰三捷俄福州陷衆多潰濬獨帥健兵進遇賊於中
麻突其陣斬前鋒五人賊兵大至鏖戰三時頃濬中
箭墜馬健下馬掖之胥被獲濬戟手大罵賊縛濬階
下先斫手指罵彌厲再斫一指亦如之指且盡斫
兩腕次及兩足濬色不少變罵聲猶不絕遂割其喉

古而死健亦以死拒賊善義之舍健使歛瘞屍健歸
請兵於帥以復讐弗聽健盡散家貲結死士百人詐
為工商流丐入賊中夜半發火大譟賊驚擾自相屠
戮健手斬殺父者張破四并擒善及寇首陳伯祥來
獻磔之贈濬福建行省檢校官授健古田縣尹官為
濬立祠福州北門外歲時致祭

馮純陽曲人舉進士為河南行省平章後封魏國公子
思溫累官彰德路總管後封晉國公思溫子本翰林

檢討

馮恩陽曲人通經籍敦行誼蒞官廉明善理冤抑累官
御史中丞集賢院大學士

郭周奇嵐人官義勇軍萬戶遇歲饑發廩賑貸多所全
活超授本州防禦使賜金牌充宣差提控再進鎮國
上將軍鎮遠節度使兼嵐州管內觀察使河東北路
關外六州都元帥懸帶虎頭金牌便宜行事卒於官
武祺太谷人以儒進歷知安慶路桐城縣事發奸摘伏


果斷如神淮西廉訪司與安慶路交章舉薦歷省部
臺二十餘年官至甘肅行省叅政妻王氏罵寇死節
杜克溫太谷人上都巡警院使有没入男女奏許令配
偶有古杜母之謠歷官銅鐵冶提舉使

武簡如太谷人性寬厚任大理評事議獄多仁恕終開
州刺史

高福太谷人授龍虎衛上將軍南北二路征討元帥事
王佐字元輔晉寧人賊至為所獲欲降之佐傲岸自如

詬賊不輟見害

賀方字伯京晉寧人以文學名為治書侍御史明兵下
集慶死之



山西通志卷一百六